


柳田文庫  
文庫11  
D 292  
65



文庫 11  
D 292  
65

宋史卷二百四十二

列傳第一

開府儀同三司上柱國錄軍國軍事前中書右丞相監修國史領經筵事都總裁脫脫等修

皇明朝列大夫國子監祭酒臣方從哲

承德郎右春坊右中允管國子監司業事 臣黃汝良等奉

勅重校刊

后妃上

太祖母昭憲杜太后

太祖孝惠賀皇后

孝章宋皇后

太宗淑德尹皇后

萬曆二十七年刊

宋史卷二百四十二

列傳第一

010190562331

明德李皇后

元德李皇后

真宗章懷潘皇后

章穆郭皇后

章獻明肅劉皇后

李宸妃

楊淑妃

沈貴妃

仁宗郭皇后

慈聖光獻曹皇后

張貴妃

苗貴妃

周貴妃

楊德妃

馮賢妃

英宗宣仁聖烈高皇后

周人尊祖之詩曰厥初生民時維姜嫄蓋推本后稷之所自出以為王跡之所由基也宋之興雖由先世積累然至宣祖功業始大昭憲杜后實生太祖太宗內助之賢母範之正蓋有以開宋世之基業者焉觀其訓太祖以無逸治天下至於豫定太宗神器之傳為宗社慮蓋益遠矣厥後慈聖光獻曹后擁佑兩朝宣仁聖烈高后垂簾聽政而有元祐之治南渡而后若高宗之以母道事隆祐孝宗奉明慈怡愉之樂皆足以為百王法程宋三百餘年外無漢王氏之患內無唐武韋之禍豈不卓然而可尚哉昭憲垂裕之功至是茂矣舊史稱昭憲性嚴毅有禮法易之家人上九曰有孚威如終吉其是之

謂歎作后妃傳

太祖母昭憲杜太后定州安喜人也父爽贈太師母范氏生五子三女太后居長旣笄歸于宣祖治家嚴毅有禮法生邕王光濟太祖太宗秦王廷美夔王光贊燕國陳國二長公主周顯德中太祖爲定國軍節度使封南陽郡太夫人及太祖自陳橋還京師人走報太后曰黠檢已作天子太后曰吾兒素有太志今果然太祖卽位尊爲皇太后太社拜太后於堂上衆皆賀太后愀然不樂左右進曰臣聞母以子貴今子爲天子胡爲不樂太后曰吾聞爲君難天子置身兆庶之上若治得其道則此位可尊苟或失馭求爲匹夫不可得是吾所以憂也

太祖再拜曰謹受教建隆二年太后不豫太祖侍藥餌不離左右疾亟召趙普入受遺命太后因問太祖曰汝知所以得天下乎太祖嗚噎不能對太后固問之太祖曰臣所以得天下者皆祖考及太后之積慶也太后曰不然正由周世宗使幼兒主天下耳使周氏有長君天下豈爲汝有乎汝百歲後當傳位於汝弟四海至廣萬幾至衆能立長君社稷之福也太祖頓首泣曰敢不如教太后顧謂趙普曰尔同記吾言不可違也命普於榻前爲約誓書普於紙尾書臣普書藏之金匱命謹密宮

人掌之太后崩于滋德殿年六十諡曰明憲葬安陵神主祔享太廟乾德二年更諡昭憲合祔安陵

太祖孝惠賀皇后開封人右千牛衛率府率景思長女也性溫柔恭順動以禮法景思常爲軍校與宣祖同居護聖營晉開運初宣祖爲太祖聘焉周顯德二年太祖爲定國軍節度使封會稽郡夫人生秦國晉國二公主魏王德昭五年寢疾薨年三十建隆三年四月詔追冊爲皇后乾德二年三月有司上諡曰孝惠四月葬安陵西北神主享于別廟神宗時與孝章淑德章懷並祔太

廟

孝明王皇后邠州新平人彰德軍節度饒第三女孝惠崩周顯德五年太祖爲殿前都點檢聘后爲繼室后恭勤不懈仁慈御下周世宗賜冠帔封琅邪郡夫人太祖卽位建隆元年八月冊爲皇后常服寬衣佐御膳善彈箏鼓瑟晨起誦佛書事杜太后得驩心生子女三人皆天乾德元年十二月崩年二十二有司上諡翰林學士竇儀撰哀冊文二年四月葬安陵之北神主享于別廟太平興國二年祔享太廟

孝章宋皇后河南洛陽人左衛上將軍偓之長女也母漢永寧公主后幼時隨母入見周太祖賜冠帔乾德五

年太祖召見復賜冠帔時僉任華州節度后隨母歸鎮  
孝明后崩復隨母來賀長春節開寶元年二月遂納入  
宮爲皇后年十七性柔順好禮每帝視朝是常具冠帔  
候接佐御饌太祖崩號開寶皇后太平興國二年居西  
宮雍熙四年移居東宮至道元年四月崩年四十四有  
司上諡權殯普濟佛舍三年正月祔葬永昌陵北命吏  
部侍郎李至撰哀冊文神主享于別廟神宗時升祔太  
廟

### 太廟

冊爲皇后并諡葬孝明陵西北神主享于別廟後升祔  
懿德符皇后陳州宛丘人魏王彥卿第六女也周顯德  
中歸太宗建隆初封汝南郡夫人進封楚國夫人太宗  
封晉王改越國開寶八年薨年三十四葬安陵西北帝  
卽位追冊爲皇后諡懿德享于別廟至道三年十一月  
詔有司議太宗配宰相請以后配詔從之奉神主升祔  
太廟后姊周世宗后也淳化四年殂

明德李皇后潞州上黨人淄州刺史處耘第二女開寶  
中太祖爲太宗聘爲妃旣納幣會太祖崩至太平興國

三年始入宮年十九雍熙元年十二月詔立爲皇后后性恭謹莊肅撫育諸子及嬪御甚厚嘗生皇子不育至道二年封后嫡母吳氏爲衛國太夫人後改封楚國及封后母陳氏爲韓國太夫人太宗崩真宗卽位至道三年四月尊后爲皇太后居西宮嘉慶殿咸平二年宰相請別建宮立名從之四年宮成移居之仍上宮名曰萬安景德元年崩年四十五諡明德權殯沙臺三年十月祔葬永熙陵禮官請以懿德明德同祔太宗廟室以先後爲次從之

李賢妃真定人乾州防禦使英之女也太祖聞妃有容德爲太宗聘之開寶中封隴西郡君太宗卽位進夫人生皇女二人皆早亡次生楚王元佐妃嘗夢日輪逼已以裾承之光耀遍體驚而悟遂生真宗太平興國二年薨年三十四真宗卽位追封賢妃又進上尊號爲皇太后有司上諡曰元德咸平三年祔葬永熙陵以中書侍郎平章事李沆爲園陵使車駕詣普安院攢宮素服行禮拜伏嗚咽命駕部郎中知制誥梁周翰撰哀冊神主祔別廟太中祥符元年追贈后父英檢校太尉安國軍節度常山郡王母魏國太夫人大中祥符三年禮官趙湘請以后祔太宗廟室真宗曰此重事也俟令禮官議

之六年秋宰相王旦與群臣表請后尊號中去太字升  
祔太廟明德之次從之

真宗章懷潘皇后大名人忠武軍節度美第八女真宗  
在韓邸太宗爲聘之封莒國夫人端拱二年五月薨年  
二十二真宗卽位追冊爲皇后諡莊懷葬永昌陵之側  
禮官言孝字連太祖諡德字連太宗諡遂改莊爲章以  
連真宗諡云

章穆郭皇后太原人宣徽南院使守文第二女淳化四  
年真宗在襄邸太宗爲聘之封曾國夫人進封秦國真

宗嗣位立爲皇后景德四年從幸西京還以疾崩年三

十二后謙約惠下性惡奢靡族屬入謁禁中服飾華侈  
必加戒勗有以家事求言於上者后終不許兄子出嫁  
以貧欲祈恩賚但出裝具給之上尤加禮重及崩上深  
嗟悼禮官奏皇帝七日釋服特詔增至十三日太常上  
諡曰莊穆靈駕發引命翰林學士楊億撰哀冊葬永熙  
陵之西北神主享于別廟以后弟崇儀副使崇仁爲莊  
宅使康州刺史姪承慶承壽皆遷官大中祥符中封后  
母高唐郡太夫人梁氏萊國太夫人仁宗卽位升祔真  
宗廟室改諡章穆



章獻明肅劉皇后其先家太原後徙益州爲華陽人祖延慶在晉漢間爲右驍衛大將軍父通虎捷都指揮使嘉州刺史從征太原道卒后通第二女也初母龐夢月入懷已而有娠遂生后后在襁褓而孤鞠於外氏善播鼗蜀人龔美者以鍛銀爲業攜之入京師后年十五入襄邸王乳母秦國夫人性嚴整因爲太宗言之令王斥去王不得已置之王宮指使張耆家太宗崩真宗卽位人爲美人以其無宗族乃更以美爲兄弟改姓劉大中祥符中爲脩儀進德妃自章穆崩真宗欲立爲皇后大臣多以爲不可帝卒立之李宸妃生仁宗后以爲已子

與楊淑妃撫視甚至后性警悟曉書史聞朝廷事能記

其本末真宗退朝閱天下封奏多至中夜后皆預聞宮闈事有問輒傳引故實以對天禧四年帝久疾居宮中事多決於后宰相寇準密議奏請皇太子監國以謀泄罷相用丁謂代之旣而入內都知周懷政謀廢后殺謂復用準以輔太子客省使楊崇勳內殿承制楊懷吉詣謂告謂夜乘犢車挾崇勳懷吉造樞密使曹利用謀明日誅懷政貶準衡州司馬於是詔皇太子開資善堂引大臣決天下事裁制於內真宗崩遺詔尊后爲皇太后軍國重事權取處分謂等請太后御別殿太后遣張

景宗雷允恭諭曰皇帝視事當朝夕在側何須別御一殿於是請帝與太后五日一御承明殿帝位左太后位右垂簾決事議已定太后忽出手書第欲禁中閱章奏遇大事卽召對輔臣其謀出於下謂非太后意也謂既貶馮拯等三上奏請如初議帝亦以爲言於是始同御承明殿百官表賀太后哀慟有司請制令稱吾以生日爲長寧節出入御大安輦鳴鞭侍衛如乘輿令天下避太后父諱群臣上尊號曰應元崇德仁壽慈聖太后御文德殿受冊天聖五年正旦太后御會慶殿群臣及契丹使者班廷中帝再拜跪上壽是歲郊祀前出手書諭百官毋請加尊號禮成帝率百官恭謝如元日七年冬至天子又率百官上壽范仲淹力言其非不聽九月詔長寧節百官賜衣天下賜宴皆如乾元節明道元年冬至復御文德殿有司陳黃麾仗設宮架登歌二舞明年帝親耕籍田太后亦謁太廟乘玉輅服禕衣九龍花釵冠齋于廟質明服衮衣十章減宗彝藻去劍冠儀天前後垂珠翠十旒薦獻七室皇太妃亞獻皇后終獻加上尊號曰應天齊聖顯功崇德慈仁保壽太后是歲崩年六十五諡曰章獻明肅葬于永定陵之西北舊制皇后皆二諡稱制加四諡自后始追贈三世皆至太師尚書

令兼中書令父封魏王初仁宗卽位尚少太后稱制雖  
政出宮闈而號令嚴明恩威加天下左右近習亦少所  
假借宮掖間未嘗妄改作內外賜與有節柴氏李氏二  
公主入見猶服髮髻太后曰姑老矣命左右賜以珠璣  
帕首時潤王元份婦安國夫人李氏老髮且落見太后  
亦請帕首太后曰大長公主太宗皇帝女先帝諸妹也  
若趙家老婦寧可比耶舊賜大臣茶有龍鳳飾太后曰  
此豈人臣可得命有司別製入香京挺以賜之賜族人  
御食必易以鈿器曰尚方器勿使人吾家也常服絕繻  
練裙侍者見仁宗左右簪珥珍麗欲效之太后戒曰彼

皇帝嬪御飾也汝安得學先是小臣方仲弓上書請依

武后故事立劉氏廟而程琳亦獻武后臨朝圖后擲其  
書于地曰吾不作此負祖宗事有潛臣劉綽者自京西  
還言在廩有出贖糧千餘斛乞付三司后問曰卿識王  
曾張知白呂夷簡曾宗道乎此四人豈因獻羨餘進哉  
后稱制凡十一年自仁宗卽位乃諭輔臣曰皇帝聽斷  
之暇宜詔名儒講習經史以輔其德於是設幄崇政殿  
之西廡而日命近臣侍講讀丁謂曹利用旣以侮權貶  
竄而天下惕然畏之晚稍進外家任內宮羅崇勳江德  
明等訪外事崇勳等以此勢傾中外兄子從德死姻戚

門人廝役拜官者數十人御史曹脩古楊偕郭勸段少連論奏太后悉逐之太后保護帝既盡力而仁宗所以奉太后亦甚備上春秋長猶不知爲宸妃所出終太后之世無毫髮間隙焉及不豫帝爲大赦悉召天下醫者馳傳詣京師諸嘗爲太后謫者皆內徙死者復其官其後言者多追詆太后時事范仲淹以爲言上曰此朕所不忍聞也下詔戒中外毋輒言於是泰寧軍節度使錢惟演請以章獻章懿與章穆並祔真宗室詔三省與禮院議皆以謂章穆皇后位崇中壺已祔真宗廟室自協一帝一后之文章獻明肅處坤元之尊章懿感日符之

賈功德莫與爲比謂宜崇建新廟同殿異室歲時薦饗

一用太廟之儀仍別立廟名以崇世享翰林學士馮元等請以奉慈爲名詔依慶曆五年禮院言章獻章懿二后請遵國朝懿德明德元德二后同祔太宗廟室故事遷祔真宗廟詔兩制議翰林學士王堯臣等議請遷二后祔序於章穆之次從之

李宸妃杭州人也祖延嗣仕錢氏爲金華縣主簿父仁德終左班殿直初入宮爲章獻太后侍兒莊重寡言真宗以爲司寢既有娠從帝臨砌臺玉釵墜妃惡之帝心卜釵完當爲男子左右取以進釵果不毀帝甚喜已而

生仁宗封崇陽縣君復生一女不育進才人後爲婉儀  
仁宗卽位爲順容從守永定陵章獻太后使劉美張懷  
德爲訪其親屬得其弟用和補三班奉職初仁宗在襁  
褓章獻以爲巳子使楊淑妃保視之仁宗卽位妃嘿處  
先朝嬪御中未嘗自異人畏太后亦無敢言者終太后  
世仁宗不自知爲妃所出也明道元年疾革進位宸妃  
薨年四十六初章獻太后欲以宮人禮治喪於外丞相  
呂夷簡奏禮宜從厚太后遽引帝起有頃獨坐簾下召  
夷簡問曰一宮人死相公云云何歟夷簡曰臣待罪宰  
相事無內外無不當預太后怒曰相公欲離間吾母子

耶夷簡從容對曰陛下不以劉氏爲念臣不敢言尚念  
劉氏則喪禮宜從厚太后悟遽曰宮人李宸妃也且柩  
何夷簡乃請治喪用一品禮殯洪福院夷簡又謂入內  
都知羅崇勳曰宸妃當以后服殮用水銀實棺異時勿  
謂夷簡未嘗道及崇勳如其言後章獻太后崩燕王爲  
仁宗言陛下乃李宸妃所生妃死以非命仁宗號慟頓  
毀不視朝累日下哀痛之詔自責尊宸妃爲皇太后諡  
莊懿幸洪福寺祭告易梓宮親哭視之妃玉色如生冠  
服如皇太后以水銀養之故不壞仁宗嘆曰人言其可  
信哉遇劉氏加厚陪葬永定陵廟曰奉慈又卽景靈宮

建神御殿曰廣孝慶曆中改諡章懿升祔太廟拜用和  
爲彰信軍節度使檢校侍中寵賚甚渥旣而追念不已  
顧無以厚其家乃以福康公主下嫁用和之子瑋

楊淑妃益州郫人祖瑄父知儼知儼弟知信隸禁軍爲  
天武副指揮使妃年十二入皇子宮真宗卽位拜才人  
又拜婕妤進婉儀仍詔婉儀升從一品位昭儀上帝東  
封西祀凡巡幸皆從章獻太后爲脩儀妃與之位幾埒  
而妃通敏有智思奉順章獻無所忤章獻親愛之故妃  
雖貴幸終不以爲已間後加淑妃真宗崩遺制以爲皇  
太后始仁宗在乳褓章獻使妃護視凡起居飲食必與

之俱所以擁佑扶持恩意勤備及帝卽位嘗召其姪承  
德見禁中欲授以諸司副使妃辭曰小兒豈勝大恩小  
官可也更命爲右侍禁章獻遺誥尊爲皇太后居宮中  
與皇帝同議軍國事閤門趣百僚賀御史中丞蔡齊目  
臺吏毋追班乃入白執政曰上春秋長習知天下情僞  
今始親政事豈宜使女后相繼稱制乎乃詔刪去遺誥  
同議軍國事語第存后號奉緡錢二萬助湯沐後名其  
所居宮曰保慶稱保慶皇太后景祐三年無疾而薨年  
五十三殯於皇儀殿帝思其保護之恩命禮官議加服  
小功初仁宗未有嗣后每勸帝擇宗子近屬而賢者養

于宮中其選卽英宗也英宗立言者謂禮慈母於子祭於孫止請廢后廟瘞其主園陵英宗弗欲遽也詔下有司議未上會帝崩遂罷后父祖皆累贈至一品知信贈節度使知信子景宗見外戚傳

沈貴妃宰相倫之孫父繼宗光祿少卿大中祥符初以將相家子被選初爲才人歷美人婕妤至德妃爲人淑儉不華帝亦以妃家世故待之異衆長秋虛位帝欲立之有從中沮之者不果嘉祐未進貴妃熙寧九年薨年八十三許出殯其家車駕臨奠輟視朝三日諡昭靜

仁宗郭皇后其先應州金城人平盧軍節度使崇之孫也天聖二年立爲皇后初帝寵張美人欲以爲后章獻太后難之后旣立而頗見踈其後尚美人楊美人俱幸數與后忿爭一日尚氏於上前有侵后語后不勝忿批其頰上自起救之誤批上頸上大怒入內都知閻文應因與上謀廢后且勸帝以爪痕示執政上以示呂夷簡且告之故夷簡亦以前罷相怨后乃曰古亦有之后遂廢詔封爲淨妃玉京冲妙仙師賜名清悟居長樂宮於是中丞孔道輔諫官御史范仲淹段少連等十人伏閣言后無過不可廢道輔等俱被黜責景祐元年出居瑤

華宮而尚美人亦廢於洞真宮入道楊美人別宅安置  
又賜后號金庭教主冲靜元師後帝頗念之遣使存問  
賜以樂府后和荅之辭甚愴惋帝嘗密令召入后曰若  
再見召者須百官立班受冊方可屬小疾遣文應挾醫  
診視數日乃言后暴薨中外疑闇文應進毒而不得其  
實上深悼之追復皇后而停諡冊祔廟之禮

慈聖光獻曹皇后真定人樞密使周武惠王彬之孫也  
明道二年郭后廢詔聘入宮景祐元年九月冊爲皇后  
性慈儉重稼穡常於禁苑種穀親蚕善飛帛書慶曆八  
年閏正月帝將以望夕再張燈后諫止後三日衛卒數

人作亂夜越屋叩寢殿后方侍帝聞變遽起帝欲出層

閉閣擁持趣呼都知王守忠使引兵入賊傷宮嬪殿下  
聲徹帝所宦者以乳媪歐小女子給奏后叱之曰賊在  
近殺人敢妄言耶后度賊必縱火陰遣人挈水踵其後  
果舉炬焚簾水隨滅之是夕所遣宦侍后皆親剪其髮  
諭之曰明日行賞用是爲驗故爭盡死力賊卽禽滅閣  
內妾與卒亂當誅祈哀幸姬姬言之帝貸其死后具衣  
冠見請論如法曰不如是無以肅清禁掖帝命坐后不  
可立請移數刻卒誅之張妃怙寵上僭欲假后蓋出游  
帝使自來請后與之無靳色妃喜還以告帝曰國家支



物儀章上下有秩汝張之而出外廷不汝置妃不擇而  
輟英宗方四歲育禁中后拊鞠周盡迨入爲嗣子替策  
居 帝夜暴疾崩后悉斂諸門鑰寘於前召皇子入及  
明宰臣韓琦等至奉英宗卽位尊后爲皇太后帝感疾  
請權同處分軍國事御內東門小殿聽政大臣日奏事  
有疑未決者則曰公輩更議之未嘗出已意頗涉經史  
多援以決事中外章奏日數十一一能紀綱要檢柅曹  
氏及左右臣僕毫分不以假借宮省肅然明年夏帝疾  
益愈卽命撤簾還政帝持書久不下及秋始行之赦有  
司崇峻典禮以弟佾同中書門下平章事神宗立尊爲

大皇太后名宮曰慶壽帝致極誠孝所以承述娛悅益  
所不盡從行登翫每先後策掖后亦慈愛天至或退朝  
稍晚必自至屏展候矚間親持饔飲以食帝外家男子  
舊母得入謁后春秋高佾亦老帝數言宜使入見輒不  
許他日佾侍帝帝復爲請乃許之因偕詣后閣少焉帝  
先起若令佾得伸親親意后遽曰此非汝所當得留趣  
遣出晚得水疾侍醫莫能治元豐二年冬疾甚帝視疾  
寢門衣不解帶旬日崩年六十四帝推恩曹氏拜佾中  
書令進官者四十餘人初王安石當國變亂舊章后乘  
間語神宗謂祖宗法度不宜輕改熙寧宗祀前數日帝

至石所后曰吾昔聞民間疾苦必以告仁宗因赦行之  
今亦當尔帝曰今無他事后曰吾聞民間甚苦青苗助  
役宜罷之安石誠有才學然怨之者甚衆帝欲愛惜保  
全之不若暫出之於外帝悚聽垂欲止復爲安石所持  
遂不果帝嘗有意於燕薊已與大臣定議乃詣慶壽宮  
白其事后曰儲蓄賜予備乎鎧仗士卒精乎帝曰固已  
辦之矣后曰事體至大吉凶悔吝生乎動得之不過南  
面受賀而已萬一不諧則生靈所係未易以言苟可取  
之太祖太宗收復久矣何待今日帝曰敢不受教蘇軾  
以詩得罪下御史獄人以爲必死后違豫中聞之謂帝

曰嘗憶仁宗以制科得軾兄弟喜曰吾爲子孫得兩宰相

相今聞軾以作詩繫獄得非仇人中傷之乎据至於詩  
其過微矣吾疾勢已篤不可以寬濫致傷中和宜熟察  
之帝涕泣軾由此得免及崩帝哀慕毀瘠殆不勝喪有  
司上諡葬于永昭陵

張貴妃河南永安人也祖頴進士第終建平令父堯封  
亦舉進士爲石州推官卒時堯封兄堯佐補蜀官堯封  
妻錢氏求挈孤幼隨之官堯佐不收恤以道遠辭妃幼  
無依錢氏遂納于章惠皇后宮寢長得幸有盛寵妃巧  
慧多智數善承迎勢動中外慶曆元年封清河郡君歲

中爲才人遷脩媛忽被疾曰妾姿薄不勝寵名願爲美人許之皇祐初進貴妃後五年薨年三十一仁宗哀悼之追冊爲皇后諡溫成追封堯封清河郡王諡景思而堯佐因緣僥倖致位通顯云

苗貴妃開封人父繼宗母許先爲仁宗乳保出嫁繼宗帝登位得復通籍妃以容德入侍生唐王昕福康公主封仁壽郡君拜才人昭容德妃英宗育於禁中妃擁佑頗有恩旣踐祚躋其前勞進貴妃贈其父至太師吳國公母陳楚國夫人福康下嫁當貶恩外家抑不肯言元祐六年薨年六十九哲宗輟朝出奠發哀苑中諡曰昭節

周貴妃開封人生四歲從其姑入宮張貴妃育爲女稍長遂得侍仁宗生兩公主帝崩妃日一蔬食屏處一室誦佛書困則假寐覺則復誦晝夜不解衣者四十年公主下嫁錢景臻郭獻卿連進至賢妃徽宗立加貴妃歷五朝勤約一致啓壽歲於周氏瑩南傍建僧屋費緡錢六萬皆貯儲奉賜郭公主先亡詔許出外第與親戚相往來年九十三薨諡昭淑

楊德妃定陶人天聖中以章獻太后姻連選爲御侍封原武郡君進美人端麗機敏妙音律組紉書藝一過目

如素習父忠爲侍禁仁宗欲加獎擢辭曰外官當積勞以取貴今以恩澤徼倖恐啓左右諛謁之端帝悅命徙居肅儀殿贈其祖貴州刺史而官其叔弟五人積與郭后不相能后旣廢妃亦遣出後復召爲婕妤好歷脩媛脩儀熙寧五年薨年五十四贈德妃

馮賢妃東平人曾祖炳知雜御史祖起兵部侍郎妃以良家女九歲入宮及長得侍仁宗生邢曾國二公主封始平郡君帝將登其品秩力辭不拜養女林美人得幸神宗生二王而没王尚幼妃保育如已子累加才人婕妤好脩容在禁掖幾六十年始終五朝動循禮度薨年七

十七 贈賢妃

英宗宣仁聖烈高皇后亳州蒙城人曾祖瓊祖繼勳皆有勲王室至節度使母曹氏慈聖光獻妃姊也故后少鞠宮中時英宗亦在帝所與后年同仁宗謂慈聖異日必以爲配旣長遂成昏濮邸生神宗皇帝岐王顥嘉王顒壽康公主治平二年冊爲皇后后弟殿內崇班士林供奉父帝欲遷其官后謝曰士林獲升朝籍分量已過豈宜援先后家比辭之神宗立尊爲皇太后居寶慈宮帝累欲爲高氏營大第后不許父之但斥望春門外隙地以賜凡營繕百役費悉出寶慈不調大農一錢元豐

八年帝不豫浸劇宰執王珪等入問疾乞立延安郡王  
爲皇太子太后權同聽政帝頷之珪等見太后簾下后  
泣撫王曰兒孝順自官家服藥未嘗去左右書佛經以  
祈福喜學書已誦論語七卷絕不好弄乃令王出簾外  
見珪等珪等再拜謝且賀是日降制立爲皇太子初岐  
嘉二土日問起居至是令母輒入又陰敕中人梁惟簡  
使其妻製十歲兒一黃袍懷以來蓋密爲踐祚倉卒備  
也哲宗嗣位尊爲太皇太后驛召司馬光呂公著未至  
迎問今日設施所宜先未及條上已散遣脩京城役夫  
減皇城規卒止禁庭工技廢導洛司出近侍尤亡狀者  
城中外母苛歛寬民間保戶馬事出中旨王珪等弗預  
知又起文彥博於旣老遣使勞諸途諭以復祖宗法度  
爲先務且令亟疏可用者從父遵裕坐西征失律抵罪  
蔡確欲獻諛以固位乞復其官后曰遵裕靈武之役塗  
炭百萬先帝中夜得報起環榻行徹旦不能寐聖情自  
是驚悸馴致大故禍由遵裕得免刑誅幸矣先帝肉未  
冷吾何敢顧私恩而違天下公議確悚慄而止光公著  
至命爲相使同心輔政一時知名士彙進於廷凡熙  
寧以來政事弗便者次第罷之於是以常平舊式改青  
苗以嘉祐差役參募役除市易之法道茶鹽之禁舉邊

若不毛之地以賜西戎而宇內復安契丹主戒其臣下復勿生事於疆場曰南朝盡行仁宗之政矣蔡確坐車蓋亭詩謫嶺表后謂大臣曰元豐之末吾以今皇帝所書佛經出示人是時惟王珪曾奏賀遂定儲極且以子繼父有何間言而確自謂有定策大功妄扇事端規爲異時眩惑地吾不忍明言姑託訕上爲名逐之耳此宗社大計姦邪怨謗所不暇恤也廷試舉人有司請循天聖故事帝后皆御殿后止之又請受冊寶於文德后曰母后當陽非國家美事況天子正衙豈所當御就崇政足矣上元燈宴后母當入觀止之曰夫人登樓上必加禮是由吾故而越典制於心殊不安但令賜之燈燭遂歲以爲常姪公繪公紀嘗轉觀察使力遏之帝請至再僅遷一秩終后之世不敢改又以官冗當汰詔損外氏恩四之一以爲宮掖先臨政九年朝廷清明華夏綏定宋用臣等旣被斥祈神宗乳媪入言之冀得復用后見其來曰汝來何爲得非爲用臣等游說乎且汝尚欲如曩日求內降于撓國政耶若復爾吾卽斬汝媪大懼不敢出一言自是內降遂絕力行故事抑絕外家私恩文思院奉上之物無問巨細終身不取其一人以爲女中堯舜元祐八年九月屬疾崩年六十二後二年章惇蔡

卞那恕始造為不根之謗皇太后太妃力辨其誣事乃已語在恕傳至高宗時卞那暴悖卞恕罪褒錄后家贈曹夫人為魏魯國夫人弟士遜士林及公繪公紀皆追王擢從孫世則節度使弟受恩者又十餘人云

宋史卷二百四十二終

宋史卷二百四十三

列傳第二

皇明朝列大夫國子監祭酒臣方從哲

承德郎右春坊右中允管國子監司業事臣黃汝良等奉

勅重校刊

后妃下

神宗欽聖獻肅向皇后 欽成朱皇后

欽慈陳皇后 林賢妃

武賢妃

哲宗昭慈孟皇后 昭懷劉皇后

徽宗顯恭王皇后

鄭皇后

王貴妃

韋賢妃

喬貴妃

劉貴妃

欽宗朱皇后

高宗憲節邢皇后

憲聖慈烈吳皇后

潘賢妃

張賢妃

劉貴妃

劉婉儀

張貴妃

孝宗成穆郭皇后

成恭夏皇后

成肅謝皇后

蔡貴妃

李賢妃

光宗慈懿李皇后

黃貴妃

寧宗恭淑韓皇后

恭聖仁烈楊皇后

理宗謝皇后

度宗全皇后

楊淑妃

神宗欽聖憲肅向皇后河內人故宰相敏中曾孫也治  
 平三年歸于穎邸封安國夫人神宗即位立為皇后帝  
 不豫后贊宣仁后定建儲之議哲宗立尊為皇太后宣  
 仁命葺慶壽故宮以居后后辭曰安有姑居西而婦處  
 東瀆上下之分不敢徙遂以慶壽後殿為隆祐宮居之



帝將卜后及諸王納婦后敕向族勿以女寘選中族黨有欲援例以恩換閣職及爲選人求京秩者且言有特旨后曰吾族未省用此例何庸以私情撓公法一不與帝倉卒晏駕獨決策迎端王章惇異議不能沮徽宗立請權同處分軍國事后以長君辭帝泣拜移時乃聽凡紹聖元符以還惇所斥逐賢大夫士稍稍收用之故事有如御正殿避家諱立誕節之類皆不用至聞賓召故老寬徭息兵愛民崇儉之舉則喜見于色纔六月卽還政明年正月崩年五十六帝追念不已乃數加恩兩舅宗良宗回皆位開府儀同三司封郡王而自敏中以上

三世亦追列王爵非常典也

欽成朱皇后開封人父崔傑早世母李更嫁朱士安后鞠於所親任氏熙寧初入宮爲御侍進才人婕妤生哲宗及蔡王以徐國公主累進德妃哲宗卽位尊爲皇太妃時宣仁欽聖二太后皆居尊故稱號未極元祐三年宣仁詔春秋之義母以子貴其尋繹故實務致優隆於是輿蓋仗衛冠服悉侔皇后紹聖中欽聖復命卽閣建殿改乘車爲輿出入由宣德東門百官上牋稱殿下名所居爲聖瑞宮贈崔任朱三父皆至師保徽宗立奉禮尤謹崇寧元年二月薨年五十一追冊爲皇后上尊諡

陪葬永裕陵

欽慈陳皇后開封人幼穎悟莊重選入掖庭爲御侍生徽宗進美人帝崩守陵殿思顧舊恩毀瘠骨立左右進粥藥揮使去曰得早侍先帝願足矣未幾薨年三十二建中靖國元年追冊爲皇太后上尊謚陪葬永裕陵林賢妃南劍人三司使特之孫司農卿洙之女幼選入宮旣長遂得幸封永嘉郡君升美人生燕王俛越王偲邢國公主進婕妤元祐五年薨詔用一品禮葬贈貴儀又贈賢妃

武賢妃始以選入宮元豐五年進才人生吳王佖賢和公主歷美人婕妤徽宗卽位進昭儀賢妃大觀元年薨乘輿臨奠輟朝三日謚曰惠穆

哲宗昭慈聖獻孟皇后洛州人眉州防禦使馬軍都虞候贈太尉元之孫女也初哲宗旣長宣仁高太后歷選世家女百餘入宮后年十六宣仁及欽聖向太后皆愛之教以女儀元祐七年諭宰執孟氏子能執婦禮宜正位中宮命學士草制又以近世禮儀簡畧詔翰林臺諫給舍與禮官議冊后六禮以進至是命尚書左僕射呂大防攝太尉充奉迎使同知樞密院韓忠彥攝司徒副之尚書左丞蘇頌攝太尉充發策使僉書樞密院事王

巖叟攝司徒副之尚書右丞蘇轍攝太尉充告期使皇  
叔祖同知大宗正事宗景攝宗正卿副之皇伯祖判大  
宗正事高密郡王宗晟攝太尉充納成使翰林學士范  
百祿攝宗正卿副之吏部尚書王存攝太尉充納吉使  
權戶部尚書劉奉世攝宗正卿副之翰林學士梁燾攝  
太尉充納采問名使御史中丞鄭雍攝宗正卿副之帝  
親御文德殿冊爲皇后宣仁太后語帝曰得賢內助非  
細事也進后父閭門祇候在爲崇儀使榮州刺史母王  
氏華原郡君父之劉婕妤有寵紹聖三年后朝景靈宮  
訖事就坐諸嬪御立侍劉獨背立簾下后閣中陳迎見  
呵之不顧閣中皆忿冬至日會朝欽聖太后於隆禧宮  
后御坐朱髹金飾宮中之制惟后得之婕妤在他坐有  
愠色從者爲易坐製與后等衆非能平因傳唱曰皇太  
后出后起立劉亦起尋各復其所或已撤婕妤好坐遂仆  
于地懟不復朝泣訴于帝內侍郝隨謂婕妤曰毋以此  
戚歟願爲大家早生子此坐正當爲婕妤好有也會后女  
福慶公主疾后有姊頗知醫嘗已后危疾以故出入禁  
掖公主藥弗效持道家治病符水入治后驚曰姊寧知  
宮中禁嚴與外間異邪令左右藏之俟帝至具言其故  
帝曰此人之常情耳后卽襲符於帝前宮禁相傳厭魅

之端作矣未幾后養母聽宣夫人燕氏尼法端與供奉  
官王堅爲后禱祠事聞詔入內押班梁從政管當御藥  
院蘇珪卽皇城司鞫之捕逮宦者宮妾幾三十人榜掠  
備至肢體毀折至有斷舌者獄成命侍御史董敦逸覆  
錄罪人過庭下氣息僅屬無一人能出聲者敦逸秉筆  
疑未下郝隨等以言脅之敦逸畏禍及已乃以奏牘上  
詔廢后出居瑤華宮號華陽教主玉清妙靜仙師法名  
沖真初章惇誣宣仁后有廢立計以后建事宣仁惇又  
陰附劉賢妃欲請建爲后遂與郝隨構成是獄天下冤  
之敦逸奏言中宮之廢事有所出情有可察詔下之日  
天爲之陰翳是天不欲廢后也人爲之流涕是人不欲  
廢后也且言嘗覆錄獄事恐得罪天下後世帝曰敦逸  
不可更在言路曾布曰陛下本以皇城獄出於近習推  
治故命敦逸錄問今乃貶錄問官何以取信中外乃止  
帝又亦悔之曰章惇誤我元符末欽聖太后將復后位  
適有布衣上書以后爲言者卽命以官於是詔后還內  
號元祐皇后時劉號元符皇后故也崇寧初郝隨諷蔡  
京再廢后昌州判官馮澥上書言后不得復臺臣錢適  
石豫左膚等連章論韓忠彥等信一布衣狂言復已廢  
之后以掠虛美望斷以大義蔡京與執政許將溫益趙

挺之張商英皆主其說徽宗從之詔依紹聖詔旨復居  
瑤華宮加賜希微元通知和妙靜仙師靖康初瑤華宮  
火徙居延寧宮又火出居相國寺前之私第金人圍汴  
欽宗與近臣議再復后尊爲元祐太后詔未下而京城  
陷時六宮有位號者皆北遷后以廢獨存張邦昌僭位  
尊后爲宋太后迎居延福宮受百官朝胡舜陟馬伸又  
言政事當取后旨邦昌乃復上尊號元祐皇后迎入禁  
中垂簾聽政后聞康王在濟遣尚書左右丞馮澥李回  
及兄子忠厚持書奉迎命副都指揮使郭仲荀將所部  
扈衛又命御營前軍統制張俊逆于道尋降手書播告  
天下王至南京后遣宗室士儀及內侍邵成章奉圭寶  
乘輿服御迎王卽皇帝位改元后以是日撤簾尊后爲  
元祐太后尚書省言元字犯后祖名請易以所居宮名  
遂稱隆祐太后上將幸揚州命仲荀衛太后先行駐揚  
州州治會張浚請先定六宮所居地遂詔忠厚奉太后  
幸杭州以苗傅爲扈從統制踰年傅與劉正彥作亂請  
太后聽政又請立皇子太后諭之曰自蔡京王黼更祖  
宗法童貫起邊事致國家禍亂今皇帝無失德止爲黃  
潛善汪伯彥所誤皆已逐矣傅等言必立皇太子太后  
曰今強敵在外我以婦人抱三歲小兒聽政將何以令

天下傳等泣請太后力拒之帝聞事急詔禪位元子太后垂簾聽政朱勝非請令臣僚得獨對論機事仍日引傳黨一人上殿以釋其疑太后從之每見傳等曲加慰撫傳等皆喜韓世忠妻梁氏在傳軍中勝非以計脫之太后召見勉令世忠速來以清巖陛梁氏馳入世忠軍諭太后意世忠等遂引兵至逆黨懼朱勝非等誘以復辟命王世修草狀進呈太后喜曰吾責塞矣再以手札趣帝還宮卽欲撤簾帝令勝非請太后一出御殿乃命撤簾是日上皇太后尊號太后聞張浚忠義欲一見之帝爲召浚至禁中承議郎馮楸嘗貽書苗傅勸復辟上未之知太后白其事楸得遷秩帝幸建寧命僉書樞密院事鄭穀衛太后繼發比至帝率群臣迎于郊會防秋迫命劉寧止制置江浙衛太后往洪州百司非預軍事者悉從仍命滕康劉珪權知三省樞密院事從行凡四方奏讞吏部差注舉辟功賞之類皆隸焉復命四廂都指揮使楊惟忠將兵萬人衛從帝慮敵人來侵密諭康珪緩急取太后旨便宜以行過落星寺舟覆宮人溺死者十數惟太后舟無虞既至洪州議者言金人自蘄黃渡江陸行二百餘里卽到洪州帝憂之命劉光世屯江州光世不爲備金人遂自大冶縣徑趣洪州康珪奉太

后行次吉州金人追急太后乘舟夜行質明至太和縣  
舟人景信反楊惟忠兵潰失宮人一百六十康珏俱遁  
兵衛不滿百遂往虔州太后及潘妃以農夫肩輿而行  
帝慮太后徑入閩廣遣使歷詢后所在及知在虔州遂  
命中書舍人李正民來朝謁時虔州府庫皆空衛軍所  
給惟得沙錢市買不售與百姓交鬪縱火肆掠土豪陳  
新率衆圍城康珏惟忠弗能禁惟忠步將胡友自外引  
兵破新于城下新乃去帝聞罷康珏命盧益李回代之  
諭輔臣曰朕初不識太后自迎至南京愛朕不啻已出  
今在數千里外兵馬驚擾當亟奉迎以愜朕朝夕慕念  
之意遂遣御營司都統辛企宗帶御器械潘永思迎歸  
太后至越帝親迎于行宮門外遍問所過守臣治狀入  
宮禁中嘗微苦風眩有宮人自言善符呪疾良已太后  
驚曰吾豈敢復聞此語耶立命出之太后生辰置酒宮  
中從容謂帝曰宣仁太后之賢古今母后未有其比昔  
奸臣肆爲謗誣雖嘗下詔明辨而國史尚未刪定豈足  
傳信吾意在天之靈不無望於帝也帝聞之悚然後迺  
更脩神宗哲宗實錄始得其正而奸臣情狀益著帝事  
太后極孝雖帷帳皆親視或得時果必先獻太后然後  
敢嘗宣教郎范燾與忠厚有憾誣與太后密養欽宗子

帝曰朕於太后如母子安得有此卽治其罪紹興五年春患風疾帝旦暮不離左右衣弗解帶者連夕四月崩於行宮之西殿年五十九遺命擇地攢殯俟軍事寧歸葬園陵帝詔曰朕以繼體之重當從重服凡喪祭用母后臨朝禮上尊號曰昭慈獻烈皇太后推恩外家凡五十人殯于會稽上皇村祔神主于哲宗室位在昭懷皇后上三年改諡昭慈聖獻后性節儉謙謹有司月供千緡而止幸南昌斥賣私絹三千匹充費尋詔文書應奏者避后父名不許群臣請上太皇太后號亦不許忠厚直顯謨閣臺諫給舍交章論列后聞卽令易武命學士院降詔戒救忠厚等不得預聞朝政通貴近至私第謁見宰執以恩澤當得官者近八十員后未嘗陳請初后受冊日宣仁太后歎曰斯人賢淑惜福薄耳異日國有事變必此人當之後皆如所云

昭懷劉皇后初爲御侍明豔冠後庭且多才藝由美人婕妤進賢妃生一子二女有盛寵能順意奉兩宮時孟后位中宮后不循列妾禮且陰造奇語以售謗內侍郝隨劉友端爲之用孟后旣廢后竟代焉右正言鄒浩上疏極諫坐竄徽宗立冊爲元符皇后明年尊爲太后名宮崇恩帝緣哲宗故曲加恩禮后以是頗干預外事且



以不謹聞帝與輔臣議將廢之而后已爲左右所逼卽  
簾鈞自縊而崩年三十五

徽宗顯恭王皇后開封人德州刺史藻之女也元符二  
年六月歸于端邸封順國夫人徽宗卽位冊爲皇后生  
欽宗及崇國公主后性恭儉鄭王二妃方亢寵后待之  
均平巨闥妄意迎合誣以闇昧帝命刑部侍郎周鼎卽  
秘獄參驗略無一跡獄止后見帝未嘗一語輒及帝幡  
然憐之大觀二年崩年二十五諡曰靜和葬裕陵之次  
紹興中始祔徽宗廟室改上今諡云

鄭皇后開封人也父紳始爲直省官以后貴累封太師

樂平郡王后本欽聖殿押班徽宗爲端王每日朝慈德  
宮欽聖命鄭王二押班供侍及卽位遂以二人賜之后  
自入宮好觀書章奏能自製帝愛其才崇寧初封賢妃  
遷貴妃有異寵徽宗多賚以詞章天下歌之王皇后崩  
政和元年立爲皇后將受冊有司劄製冠服后言國用  
未足冠珠費多請命工改製妃時舊冠又乞罷黃麾仗  
小駕鹵簿等儀從之恩澤皆弗陳請時族子居中在樞  
府后奏外戚不當預國政必欲用之且令充妃職帝爲  
罷居中居中復用后歸寧還言居中與父紳相徃還人  
皆言其招權市賄乞禁絕許御史奏劾后性端謹善順

承帝意劉貴妃薨帝思之不已將追冊爲后后卽奏妃  
乃其養子乞別議褒崇之禮帝大喜欽宗受禪尊爲太  
上皇后遷居寧德宮稱寧德太后從上皇幸南京金師  
退先歸時用事者言上皇將復辟於鎮江人情危駭或  
謂后將由端門直入禁中內侍輩頗勸欽宗嚴備帝不  
從出郊迎后於是兩宮歡甚洽上皇聞之卽罷如洛之  
議汴京破從上皇幸青城北遷留五年崩于五國城年  
五十二紹興七年何蘇等使還始知上皇及后崩高宗  
大慟詔立重成服諡顯肅后親族各遷官有差祔主徽  
宗室以聞哀日爲大忌梓宮歸入境承之以柳納羣衣

其中與徽宗合攢于會稽永祜陵先是后至金營許于

粘罕曰妾得罪當行但妾家屬不預朝政乞留不遣粘  
罕許之故紳得歸后旣行紳亦以是年薨諡僖靖家屬  
流寓江南高宗憐之詔所在尋訪賜官有鄭藻者后近  
屬也紹興中帶御器械用后祔廟恩拜隴州防禦使凡  
四使金歷官至保信軍節度使加太尉卒追封榮國公  
諡端靖

王貴妃與鄭后俱爲押班徽宗立封平昌郡君進位至  
貴妃生鄆王楷莘王植陳王機惠淑康淑順德柔福冲  
懿帝姬政和七年九月薨諡曰懿肅

萬曆二十七年刊  
宋史卷三百四十三  
列傳  
十一

韋賢妃開封人高宗母也初入宮爲侍御崇寧末封平昌郡君大觀初進婕妤好累遷婉容高宗在康邸出使進封龍德宮賢妃從上皇北遷建炎改元遙尊爲宣和皇后封其父安道爲郡王官親屬三十人由是遣使不絕紹興七年徽宗及鄭皇后崩聞至帝號慟諭輔臣曰宣和皇后春秋高朕思之不遑寧處屈已講和正爲此耳翰林學士朱震引唐建中故事請遙尊爲皇太后從之已而太常少卿吳表臣請依嘉祐治平故事俟三年喪畢然後舉行乃先降御札播告天下后三代俱追封王帝以后久未歸每輦蹙曰金人若從朕請餘皆非所問也王倫使回言金人許歸后未幾金人遣蕭哲來亦言后將歸狀遂豫作慈壽宮命莫將韓恕爲奉迎使十年以金人猶未歸后乃遙上皇太后冊寶於慈寧殿是後生辰至朔皆遙行賀禮洪皓在燕求得后書遣李微持歸帝大喜曰遣使百輩不如一書遂加微官金人遣蕭毅邢具瞻來議和帝曰朕有天下而養不及親徽宗無及矣今立誓信當明言歸我太后朕不耻和不然朕不憚用兵毅等還帝又語之曰太后果還自當謹守誓約如甚未也雖有誓約徒爲虛文命何鑄曹勛報謝召至內殿諭之曰朕北望庭闈無淚可揮卿見金主當曰慈

親之在上國一老人耳在本國則所繫甚重以至誠說之庶彼有感動鑄等至金國首以后歸爲請金主曰先朝業已如此豈可輒改助再三懇請金主始允鑄等就館館伴耶律紹文來言金主許從所請洪皓聞之先遣人來報鑄等還具言其實遂命參政王文翁爲奉逆使金人遣其臣高居安完顏宗賢等扈從以行十二年四月次燕山自東平舟行由清河至楚州旣渡淮命太后弟安樂郡王韋淵秦魯國大長公主吳國長公主迎于道帝親至臨平奉迎普安郡王宰執兩省三衙管軍皆從帝初見太后喜極而泣八月至臨安入居慈寧宮先是以梓宮未還詔中外輟樂至是慶太后壽節始用樂謁家廟親屬遷官幾二千人太后聰明有智慮初金人許還三梓宮太后恐其反覆呼役者畢集然後起攢時方暑金人憚行太后慮有他變乃陽稱疾須秋涼進發已而稱貸于金使得黃金三千兩以犒其衆由是途中無間言太后在北方聞韓世忠名次臨平呼世忠至簾前慰勞還宮帝侍太后或至夜分未去太后曰且休矣聽朝宜早恐妨萬幾又嘗謂兩宮給使宜令通用不然則有彼我之分而佞人間言易以入也時皇后未立太后屢爲帝言帝請降手書太后曰我但知家事外庭非

所當預將行冊合平典禮悉能記之帝先意承志惟恐不及或一食稍減輒不勝憂懼常戒宮人曰太后年已六十惟優游無事起居適意卽壽考康寧事有所闕慎毋令太后知第來白朕十九年太后年七十正月朔卽宮中行慶壽禮親屬各遷官一等太后微恙累月不出殿門會牡丹盛開帝入白太后欣然步至花所因留宴竟日盡歡翌日以諭宰執后苦日疾募得醫皇甫坦治卽愈二十九年太后壽登八十復行慶禮親屬進官一等庶人年九十宗子女若貢士已上父母年八十者悉官封之九月得疾上不視朝敕輔臣祈禱天地宗廟

社稷赦天下減租稅俄崩于慈寧宮謚曰顯仁攢于承佑陵之西祔神主太廟徽宗室親屬進秩者十四人授官者三人太后性節儉有司進金唾壺太后易令用塗金宮中賜予不過三數千所得供進財帛多積於庫至是喪葬之費皆仰給焉然好佛老初高宗出使有小妾言見四金甲人執刀劔以衛太后曰我祠四聖謹甚必其陰助旣北遷常設祭及歸立祠西湖上

喬貴妃初與高宗母韋妃俱侍鄭皇后結爲姊妹約先貴者毋相忘旣而貴妃得幸徽宗遂引韋氏二人愈相得二帝北遷貴妃與韋氏俱至是韋妃將還貴妃以金

五十兩贈高居安曰薄物不足爲禮願好護送姊還江南復舉酒酌韋氏曰姊善重保護歸卽爲皇太后妹無還期終死於朔漠矣遂大慟以別

劉貴妃其出單微入宮卽大幸由才人七遷至貴妃生濟陽郡王棫祁王模信王榛政和三年秋薨先是妃手植芭蕉於庭曰是物長吾不及見矣已而果然左右奔告帝帝初以其微疾不經意趣幸之已薨矣始大悲惻特加四字諡曰明達懿文叙其平生絃諸樂府又欲踵溫成故事追崇使皇后表請因冊贈爲后而以明達諡焉時又有安妃劉氏者本酒保家女初事崇恩宮宮罷出居宦者何新家內侍楊戩譽其美復召入妃以同姓養爲女遂有寵爲才人進至淑妃生建安郡王模嘉國公倚英國公懿和福帝姬政和四年加貴妃朝夕得侍上擅愛顯席嬪御爲之稀進擢其父劉宗元節度使妃天資警悟解迎意合旨雅善塗飾每製一服外間卽倣之林靈素以技進目爲九華玉真安妃肖其像于神霄帝君之左宣和三年薨年三十四初諡明節和文旋用明達近比加冊贈爲皇后葬其園之西北隅帝悼之甚後宮皆往唁帝相與啜泣崔妃獨左視無戚容帝悲怒疑其爲厭蠱卜者劉康孫緣妃以進喜妄談休咎捕送

開封獄醫曹孝忠侍疾無狀閣內侍王堯臣坐盜金珠及出金明池游宴事併鞫治獄成同日誅死遂廢崔妃為庶人崔生漢王椿及帝姬五人云

欽宗朱皇后開封祥符人父伯材武康軍節度使欽宗在東宮徽宗臨軒備禮冊為皇太子妃欽宗即位立為皇后追封伯材為恩平郡王后既北遷不知崩開慶元三年上尊號諡仁懷祔于太廟欽宗室推恩后家十五人五年奉安神御于景靈宮兄二人孝孫靖康中以節鉞換授右金吾衛上將軍卒贈開府儀同三司孝章一日孝莊官至永慶軍承宣使卒贈昭化軍節度使

高宗憲節邢皇后開封祥符人父煥朝請即高宗居邸即以婦聘之封嘉國夫人王出使夫人留居蕃衍宅金人犯京師夫人從三宮北遷上皇遣曹勛歸夫人脫所御金環使內侍持付勛曰幸為吾白太王願如此環得早相見也王憐之及即位遙冊為皇后官后親屬二十五人紹興九年后崩于五國城年三十四金人秘之高宗虛中宮以待者十六年顯仁太后回鑾始得崩聞上為輟朝行釋服之祭諡懿節祔主于別廟紹興十二年八月后梓宮至攢于聖獻太后梓宮之西北帝思后殊慘不樂皇后吳氏知帝意乃請為其姪珣琚婚邢氏二

女以慰帝心淳熙未改諡憲節祔高宗廟

憲聖慈烈吳皇后開封人父近以后貴累官武翼郎贈太師追封吳王諡宣靖近嘗夢至一亭扁曰侍康傍植芍藥獨放一花殊妍麗可愛花下白羊一近寤而異之后以乙未歲生方產時紅光徹戶外年十四高宗爲康王被選入宮人謂侍康之徵王卽帝位后常以戎服侍左右后頗知書從幸四明衛士謀爲變入問帝所在后紿之以免未幾帝航海有魚躍入御舟后曰此周人白魚之祥也帝大悅封和義郡夫人還越進封才人后益博習書史又善翰墨由是寵遇日至與張氏並爲婉儀

尋進貴妃顯仁太后回鑿亦愛后憲節皇后崩聞至秦檜等累表請立中宮太后亦爲言紹興十三年詔立貴妃爲皇后帝御文德殿授冊后卽穆清殿廷受之追王三代親屬由后官者三十五人顯仁太后性嚴肅后身承起居順適其意嘗繪古列女圖置坐右爲鑒又取詩序之義扁其堂曰賢志初伯琮以宗子召入宮命張氏育之后時爲才人亦請得育一子於是得伯玖更名璩中外議頗籍籍張氏卒併育于后后視之無間伯琮性恭儉喜讀書帝與后皆愛之封普安郡王后嘗語帝曰普安其天日之表也帝與決立爲皇子封建王出璩居



紹興高宗內禪手詔后稱太上皇后遷居德壽宮孝宗  
卽位上尊號曰壽聖太上皇后月朔朝上皇畢入見后  
如宮中儀乾道七年加號壽聖明慈淳熙二年以上皇  
行慶壽禮復加壽聖齊明廣慈之號十年以后年七十  
親屬推恩有差十二年加尊號曰備德上皇崩遺詔改  
稱皇太后帝欲迎還大內太后以上皇几筵在德壽宮  
不忍舍去因名所御殿曰慈福居焉光宗卽位更號壽  
聖皇太后以壽皇故不稱太皇太后也帝嘗言及用人  
后曰宜崇尚舊臣紹熙四年后壽八十帝乃覲后奉冊  
禮加尊號曰隆慈備福五年正月帝率群臣行慶壽禮

嘉王侍側后勉以讀書辨邪正立綱常爲先夏竦宗廟  
始正太皇太后之號時光宗疾未平不能執喪宰臣請  
垂簾主喪事后不可已而宰執請如唐肅宗故事羣臣  
發喪太極殿成服禁中許之后代行祭奠禮尋用樞密  
趙汝愚請於梓宮前垂簾宣光宗手詔立皇子嘉王爲  
皇帝翌日冊夫人韓氏爲皇后撤簾慶元元年加號光  
祐遷居重華宮汝愚後以謫死中書舍人汪義端目汝  
愚爲李林甫欲併逐其黨太后聞而非之三年十月后  
寢疾詔禱天地宗廟社稷大赦天下踰月而崩年八十  
三遺詔太上皇帝疾未痊齋宜於宮中承重皇帝服齊

衰五月以日易月詔服期年喪諡曰憲聖慈烈攢祔于  
永思陵

潘賢妃開封人元懿太子母也父永壽直翰林醫局官  
高宗居康邸時納之邢后北遷妃未有位號帝即位將  
立爲后呂好問諫止之立爲賢妃太子薨從隆祐太后  
于江西踰年還紹興十八年薨永壽贈太子少師

張賢妃開封人建炎初爲才人有寵進婕妤帝欲擇宗  
室子養禁中輔臣問帝以宮中可付託者誰耶帝曰已  
得之矣意在婕妤已而伯琮入宮年尚幼婕妤與潘賢  
妃吳才人方環坐以觀其所向時賢妃新失皇子意忽

忽不樂婕妤手招之遂向婕妤帝因命婕妤母之是爲

孝宗尋遷婕妤儀十二年卒上爲輟朝二日贈賢妃弟萃  
閣門宣贊舍人妃薨遷秩二階

劉貴妃臨安人入宮爲紅霞帔遷才人累遷婕妤婉容  
紹興二十四年進賢妃頗恃寵驕侈嘗因盛夏以水晶  
飾脚踏帝見之命取爲枕妃懼撤去之淳熙十四年薨  
父懋累官昭慶軍節度使金人南侵獻錢二萬緡以助  
軍興費懋子允升紹興末爲和州防禦使知閣門事奉  
使還遷荊州防禦使福州觀察使

劉婉儀初入宮封宜春郡夫人尋進才人與劉婉容俱

被寵進婉儀婉儀頗恃恩招權嘗遣人諷廣州番商獻明珠香藥許以官爵舶官林孝澤言于朝詔止其獻金人將叛盟劉錡主戰幸醫王繼先從中沮之因謀誅錡帝不懌一日在婉儀位有憂色婉儀陰訪得其言以寬譬帝意帝恠與繼先言合詰之婉儀急具以實對帝大怒託以他過廢之况抗累官和州防禦使知閣門事婉儀既廢乃與嗣寵歸

張貴妃開封祥符人初入宮封永嘉郡夫人乾道六年進婉容淳熙七年封太上皇淑妃十六年進貴妃紹熙元年薨美人馮氏才人韓氏吳氏李氏王氏俱被寵幸後皆廢吳氏中宮近屬也紹興三十年復故封李氏王氏俱明豔淳熙末上皇愛之及崩憲聖后見二才人每感憤孝宗卽追告命許自便蓋非常制云

孝宗成穆郭皇后開封祥符人奉直大夫直卿之女孫其六世祖爲章穆皇后外家孝宗爲普安郡王時納郭氏封咸寧郡夫人生光宗及莊文太子情魏惠憲王愷邵悼肅王恪紹興二十六年薨年三十一追封淑國夫人三十一年用明堂恩贈福國夫人既建太子追封皇太子妃及受禪追冊爲皇后諡恭懷尋改安穆及營阜陵又改成穆祔孝宗廟父城累官昭慶軍承宣使追封

榮王孝宗待郭氏恩禮彌厚然不假外戚以官爵后弟師禹師元官不過承宣使師元不及建節而卒將內禪師禹始除節度使光宗朝官至太保封永寧郡王成恭夏皇后袁州宜春人曾祖令吉爲吉水簿夏氏初入宮爲憲聖太后閣中侍御普安郡王夫人郭氏薨太后以夏氏賜王封齊安郡夫人卽位進賢妃踰年奉上帝命立爲皇后乾道二年謁家廟親屬推恩十一人三年崩謚安恭寧宗時改謚成恭初后之生也有異光寧室父協奇之及長以姿納宮中久之父居益困及歸客袁之僧舍號夏翁翁亡后始貴訪得其弟執中補承信郎閤門祇候未幾遷右武郎閤門宣贊舍人累遷奉國軍節度使提舉萬壽觀寧宗卽位加少保踰年卒于家初執中與其微時妻至京宮人諷使出之擇配貴族欲以媚后執中弗爲動他日后親爲言執中誦宋弘語以對后不能奪旣貴始從師學作大字頗工復善騎射高宗行慶壽禮近戚爭獻珍環執中獨大書一人有慶萬壽無疆以獻高宗喜賜賚甚渥嘗爲館伴副使連射皆命中金人駭服孝宗聞其才將召用之謝曰他日無累陛下保全足矣人以此益賢之

成肅謝皇后丹陽人幼孤鞠於翟氏因冒姓焉及長被

選入宮憲聖太后以賜普安郡王封咸安郡夫人王卽  
位進婉容踰年進貴妃成恭皇后崩中宮虛位淳熙三  
年妃侍帝過德壽宮上皇諭以立后意尋遣張去爲傳  
旨立貴妃爲皇后復姓謝氏親屬推恩者十人光宗受  
禪上尊號壽成皇后孝宗崩尊爲皇太后慶元初加號  
惠慈嘉泰二年加慈佑太皇太后三年崩諡成肅攢祔  
于永阜陵后性儉慈減膳羊每食必先以進御服澣濯  
衣有數年不易者弟淵以后貴授武翼郎后嘗戒之曰  
主上化行恭儉吾亦躬服澣濯爾宜崇謙抑遠驕侈後  
歷閣門宣贊舍人帶御器械光宗朝遷果州團練使寧

宗立轉萊州防禦使擢知閣門事仍幹辦皇城司三遷  
至保信軍節度使尋加太尉開府儀同三司成肅皇后  
崩遺誥賜淵錢十萬緡金二千兩田十頃餼緡日十千  
後累陞三少封和國公嘉定四年薨贈太保

蔡貴妃初入宮爲紅霞帔封和義郡夫人進婉容淳熙  
十年冬拜貴妃十二年秋薨父滂宜春觀察使

李賢妃初入宮爲典字轉通義郡夫人進婕妤淳熙十  
年卒贈賢妃時李燾在經筵嘗諫省後宮費帝曰朕老  
矣安有是近葬李妃用三萬緡耳帝雖在位久後宮寵  
幸無著聞者

光宗慈懿李皇后安陽人慶遠軍節度使贈太尉道之中女初后生有黑鳳集道營前石上道心異之遂字后曰鳳娘道帥湖北聞道士皇甫坦善相人乃出諸女拜坦坦見后驚不敢受拜曰此女當毋天下坦言於高宗遂聘爲恭王妃封榮國夫人進定國夫人乾道四年生嘉王七年立爲皇太子妃性妬悍嘗訴太子左右於高孝二宮高宗不懌謂吳后曰是婦將種吾爲皇甫坦所誤孝宗亦屢訓后宜以皇太后爲法不然行當廢汝后疑其說出於太后及太子卽位冊爲皇后光宗欲誅宦者近習皆懼遂謀離間三宮會帝得心疾孝宗購得良藥欲因帝至宮授之宦者遂訴於后曰太上合藥一大丸俟宮車過卽投藥萬一有不虞其柰宗社何后覘藥實有心術之頃之內宴后請立嘉王爲太子孝宗不許后曰妾六禮所聘嘉王妾親生也何爲不可孝宗大怒后退持嘉王泣訴于帝謂壽皇有廢立意帝惑之遂不朝太上帝嘗宮中洗手睹宮人手白悅之他日后遣人送食合于帝啓之則宮人兩手也又黃貴妃有寵因帝親郊宿齊宮后殺之以暴卒聞是夕風雨大作黃壇燭盡滅不能成禮帝疾由是益增劇不視朝政事多決於后矣后益驕奢封三代爲王家廟逾制衛兵多於太廟

后歸謁家廟推恩親屬二十六人使臣一百七十二人下至李氏門客亦奏補官中興以來未有也是時帝久不朝太上中外疑駭紹興四年九月重明節宰執侍從臺諫連章請帝過宮給事中謝深甫言父子至親天理昭然太上之愛陛下亦猶陛下之愛嘉王太上春秋高千秋萬歲後陛下何以見天下帝感悟趣命駕朝重華宮是日百官班列俟帝出至御屏后挽留帝入曰天寒官家且飲酒百僚侍衛相顧莫敢言中書舍人陳傅良引帝裙請母入因至屏後后叱曰此何地爾秀才欲斫頭邪傅良下殿慟哭后復使人問曰此何理也傅良曰子諫父不聽則號泣而隨之后益怒遂傳旨罷還宮其後孝宗崩帝不能親執喪宰相趙汝愚謀內禪立寧宗尊后曰太上皇后上尊號曰壽仁慶元六年崩年五十六諡慈懿

黃貴妃淳熙末在德壽宮封和義郡夫人光宗爲皇太子傍無侍姬上皇以夫大賜之遂專寵卽位拜貴妃紹熙二年冬十一月爲皇后李氏所殺帝聞而成疾又有張貴妃亦舊侍東宮次婕妤好符氏後出嫁於民間寧宗恭淑韓皇后相州人其六世祖爲忠獻王琦初后與姊俱被選人宮后能順適兩宮意遂歸平陽郡邸封

新安郡夫人進崇國夫人王受禪冊夫人爲皇后后父  
同卿由知泰州陞揚州觀察使母莊氏封安國夫人慶  
元六年崩諡恭淑同卿累遷慶遠軍節度使加太尉慶  
元五年卒贈太師諡恭靖同卿季父侂胄自以有定策  
功聲勢熏灼同卿每懼滿盈不敢干政時天下皆知侂  
胄爲后族不知同卿乃后父也同卿沒一年而后崩侂  
胄竟敗人始服其善遠權勢云同卿子埃后兄也官至  
承宣使

恭聖仁烈楊皇后少以姿容選入宮忘其姓氏或云會  
稽人慶元元年三月封平樂郡夫人三年四月進封婕  
妤有楊次山者亦會稽人后自謂其兄也遂姓楊氏五  
年進婉儀六年進貴妃恭淑皇后崩中宮未有所屬貴  
妃與曹美人俱有寵韓侂胄見妃任權術而曹美人性  
柔順勸帝立曹而貴妃頗涉書史知古今性復機警帝  
竟立之次山客王夢龍知其謀密以告后后深銜之與  
次山欲因事誅侂胄會侂胄議用兵中原俾皇子曦入  
奏侂胄再啓兵端將不利於社稷帝不荅后從傍贊之  
甚力亦不荅恐事泄俾次山擇廷臣可任者與共圖之  
禮部侍郎史彌遠素與侂胄有隙遂欣然奉命參知政  
事錢象祖嘗諫用兵貶信州彌遠乃先告之禮部尚書



衛涇著作郎王居安前右司郎官張鉉皆預其謀開熙  
三年十一月三日侂胄方早朝彌遠密遣中軍統制夏  
震伏兵六部橋側率健卒擁侂胄至玉津園槌殺之復  
命彌遠象祖等俱赴延和殿以極侂胄聞帝不之信越  
三日帝猶謂其未死蓋是謀悉出中宮及次山等帝初  
不知也后既誅侂胄彌遠日益貴用事嘉定十四年帝  
以國嗣未定養宗室子貴和立爲皇子賜名竑彌遠爲  
丞相既信任於后遂專國政竑漸不能平初竑好琴彌  
遠買美人善琴者納之而私厚美人家令伺皇子動靜  
竑嬖之一日竑指輿地圖示美人曰此瓊崖州也他日

必置史彌遠於此地美人以告彌遠竑又書字於几曰  
彌遠當決配八千里竑左右皆彌遠腹心走白彌遠彌  
遠大懼陰蓄異志欲立他宗室子昀爲皇子遂陰與昀  
通十七年閏八月丁酉帝大漸彌遠夜召昀入宮后尚  
未知也彌遠遣后兄子谷及石以廢立事白后后不可  
曰皇子先帝所立豈敢擅變是夜凡七往反后終不聽  
谷等乃拜泣曰內外軍民皆已歸心苟不立之禍變必  
生則楊氏無噍類矣后默然良久曰其人安在彌遠等  
召昀入后拊其背曰汝今爲吾子矣遂矯詔廢竑爲濟  
王立昀爲皇子卽帝位尊皇后曰皇太后同聽政寶慶

二年十一月戊寅加尊號壽明紹定元年正月丙子復  
加慈睿四年正月后壽七十帝率百官朝慈明殿加尊  
號壽明仁福慈睿皇太后十二月辛巳后不豫詔禱祠  
天地宗廟社稷宮觀赦天下五年十二月壬午崩于慈  
明殿壽七十有一諡恭聖仁烈次山官至少保封永陽  
郡王次山二子谷封新安郡王石永寧郡王自有傳姪  
孫鎮尚理宗女周漢公主官至左領軍衛將軍駙馬都  
統宗族鳳孫等皆任通顯云

理宗謝皇后諱道清天台人父渠伯祖深甫后生而薰  
黑醫一目渠伯早卒家產益破壞后嘗躬親汲任初深

甫爲相有援立楊太后功太后德之理宗卽位議擇中  
宮太后命選謝氏諸女后獨在室兄弟欲納入宮諸父  
擗伯不可曰卽奉詔納女當厚奉資裝異時不過一老  
宮婢事奚益會元夕縣有鵲來巢燈山衆以爲后妃之  
祥擗伯不能止乃供送后就道后旋病疹良已膚蛻瑩  
白如玉醫又藥去目醫時賈涉女有殊色同在選中及  
入宮理宗意欲立賈太后曰謝女端重有福宜正中宮  
左右亦皆竊語曰不立真皇后乃立假皇后邪帝不能  
奪遂定立后初封通議郡夫人寶慶三年九月進貴妃  
十二月冊爲皇后后旣立賈貴妃專寵貴妃薨閻貴妃

又以色進后處之裕如畧不介懷太后深賢之而帝禮  
遇益加焉開慶初大元兵渡江理宗議遷都平江慶元  
后諫不可恐搖動民心乃止理宗崩度宗立咸淳三年  
尊爲皇太后號壽和聖福進封三代父渠伯魏王祖深  
甫曾祖景之皆曾王宗族男女各進秩賜封賞賚有差  
度宗崩瀛國公卽位尊爲太皇太后太后年老且疾大  
臣屢請垂簾同聽政彊之乃許加封五代太后以兵興  
費繁痛自裁節汰慈元殿提舉已下官省汎索錢緡月  
萬平章賈似道兵潰陳宜中上疏請正其罪太后曰似  
道勤勞三朝豈宜以一旦罪而失遇大臣禮先削其官  
後乃寘法貶死京朝官聞難往往避匿遁去太后命揭  
榜朝堂曰我國家三百年待士大夫不薄吾與嗣君遭  
家多難爾小大臣不能出一策以救時艱內則畔官離  
次外則委印棄城避難偷生尚何人爲亦何以見先帝  
於地下乎天命未改國法尚存凡在官守者尚書省卽  
與轉一資負國逃者御史覺察以聞德祐元年六月朔  
日食旣太后削聖福以應天變丞相王爚老病陳宜中  
留夢炎庸懦無所長日坐朝堂相爭戾而張世傑兵敗  
於焦山宜中棄官去太后累召不至遺書宜中毋使勉  
之十月始還朝太后又親爲書召夏貴等兵曰吾母子

不足念獨不報先帝德乎貴等亦罕有至者是月大元兵破常州太后遣陸秀夫等請和不從宜中卽率公卿請遷都太后不許宜中痛哭固請不得已從之明日當啓行而宜中倉卒失奏於是宮車已駕日且暮而宜中不至太后怒而止明年正月更命宜中使軍中約用臣禮宜中難之太后涕泣曰苟存社稷臣非所較也未幾大元兵薄臯亭山宜中霄遁文武百官亦潛相引去二月辛丑大軍駐錢塘宋亡瀛國公與全后入朝太后以疾留杭是年八月至京師降封壽春郡夫人越七年終年七十四無子兄奕宋時封郡王姪堂兩浙鎮撫大使

尚榮郡公主暨皇並節度使端平初頗干國政云

度宗全皇后會稽人理宗母慈憲夫人姪孫女也略涉書史幼從父昭孫知岳州開慶初秩滿歸道潭州時大元兵自羅鬼入破全衡永桂圍潭州人有見神人衛城者已而潭獨不下逾年事平至臨安會忠王議納妃初丁大全請選知臨安府顧崑女已致聘矣大全敗崑亦罷去臺臣論崑大全黨宜別選名族以配太子臣僚遂言全氏侍其父昭孫往返江湖備嘗艱險其處貴富必能盡警戒相成之道理宗以母慈憲故乃詔后入宮問曰爾父昭孫昔在寶祐間沒於王事每念之令人可哀

后對曰妾父可念淮湖之民尤可念也帝深異之語大  
臣曰全氏女言辭甚令宜配冢嫡以承祭祀景定二年  
十一月詔封永嘉郡夫人十二月冊爲皇太子妃弟永  
堅等禱承信郎直秘閣度宗立咸淳三年正月冊爲皇  
后追贈三代賜家廟第宅弟清夫庭輝等一十五人各  
轉一官五年三月后歸寧推恩姻族五十六人進一秩  
咸平郡夫人全氏三十二人各特封有差后生子不育  
次生瀛國公十年度宗崩瀛國公立冊爲皇太后宋亡  
從瀛國公入朝于燕京後爲尼正智寺而終

楊淑妃初選入宮爲美人咸淳二年進封淑妃推恩親

屬幼節等三十四人進秩有差生建國公是宋亡是走  
溫州又走福州衆推爲主冊妃爲太后封弟昺衛王昺  
脩容俞氏所生也至元十四年大軍圍昺於海上明年  
四月昺卒昺代立十六年春二月昺投海死如聞之大  
勳曰我艱關忍死者正爲趙氏祭祀尚有可望爾今天  
命至此夫復何言遂赴海死其將張世傑葬之海濱

開府儀同三司柱國錄事省前書省丞相樞密院副都總裁脫脫等修

皇明朝列大夫國子監祭酒臣方從哲

承德郎右春坊右序監國子監司業事臣黃汝良等奉

初重郊刊

宗室一

魏王廷美

燕王德昭

秦王德秀秀王子儼附

昔周之初興大封建宗室及其東遷晉鄭有同獎之功  
然其衰也榦弱而枝強後世於是有矯其失者而封建

不復古矣宋承唐制宗王祿祿卽裂土而爵之然名存  
實亡無補於事降至疏屬宗正有籍玉牒有名宗學有  
教郊祀明堂遇國慶典皆有祿秩所寓州縣月有廩餼  
至於宗女適人亦有恩數然國祚旣長世代浸遠恒產  
豐約去士庶之家無甚相遠者靖康之亂諸王駢首以  
弊於金人之虐論者咎其無封建之實故不獲維城之  
勛焉雖然東都之仁宗南渡之高寧元良虛位立繼小  
宗大策一定卒無動搖磐石之固亦可知矣且宋於宗  
室稍有過差君臣之間不吝於改尤不憚於言涪陵武  
功真宗卽位尋議追復改葬封其子孫濮邸尊稱言者  
惟務格非不少避忌宋末濟邸國事將亡諫疏不息必  
褒卹而後止是蓋歷代之所難得者歟表而出之作宗  
室傳

魏悼王廷美字文化本名光美太平興國初改今名太  
祖兄弟五人兄光濟早亡宋興追封邕王改曹王弟光  
義卽太宗次廷美次光贊幼亡追封夔王改岐王建隆  
元年授廷美嘉州防禦使二年遷興元尹山南西道節  
度使乾德二年加同中書門下平章事開寶六年加檢  
校太保侍中京兆尹永興軍節度使太宗卽位加中書  
令開封尹封齊王又加檢校太師從征太原進封秦王

七年三月或告秦王廷美驕恣將有陰謀竊發上不忍  
暴其事遂罷廷美開封尹授西京留守賜襲衣通犀帶  
錢千萬緡絹絲各萬匹銀萬兩西京甲第一區詔樞密  
使曹彬餞廷美於瓊林苑以太常博士王通判河南府  
事開封府判官閻矩判留守事以如京使柴禹錫爲宣  
徽北院使兼樞密副使楊守一爲東上閤門使充樞密  
都承旨賞其告廷美陰謀功也左衛將軍樞密承旨陳  
從龍爲左衛將軍皇城使劉知信爲右衛將軍弓箭庫  
使惠延真爲商州長史禁軍列校皇甫繼明責爲汝州  
馬步軍都指揮使定人王榮爲濮州教練使皆坐交通  
廷美及受其燕犒也榮未行或又告榮嘗與廷美親吏  
狂言我不久當得節帥坐削籍流海島會趙普再相廉  
得盧多遜與廷美交通事上聞上怒責授多遜兵部尚  
書下御史獄捕繫中書守堂官趙白秦府孔目官閻審  
小吏王繼勳樊德明趙懷祿閻懷忠等命翰林學士承  
旨李昉學士扈蒙衛尉卿崔仁冀膳部郎中兼御史知  
雜滕中正雜治之多遜自言累遣趙白以中書機事密  
告廷美去年九月中又令趙白言於廷美云願宮車晏  
駕盡力事太王廷美遣樊德明報多遜云承旨言正會  
我意我亦願宮車早晏駕私遣多遜弓箭等多遜受之



閻密初給事廷美上卽位補殿直仍隸秦王府恣橫不法言多指斥王繼勳尤爲廷美親信嘗使求訪聲妓怙勢取貨贓污狼藉樊德明素與趙白遊處多遜因之以結廷美廷美又遣趙懷祿私召同母弟軍器庫副使趙廷俊與語閻懷忠嘗爲廷美詣淮海王錢俶求犀玉帶金酒器懷忠受俶私遺白金百兩金器絹扇等廷美又嘗遣懷忠齎銀盃錦綵羊酒詣其妻父御前忠佐馬軍都軍頭開封潘潸營燕軍校至是皆伏罪詔文武常參官集議朝堂太子太師王溥等七十四人奏多遜及廷美願望兇詛大逆不道宜行誅滅以正刑章趙白等

斬詔削奪多遜官爵并家屬流崖州廷美勒歸私第趙白閻密王繼勳樊德明趙懷祿閻懷忠皆斬於都門外籍其家財詔秦王廷美男女等宜正名稱貴州防禦使德恭等仍爲皇姪皇姪女適韓氏去雲陽公主之號右監門將軍韓崇業降爲右千牛衛率府率仍去駙馬都尉之號並發遣西京就廷美居止五月貶西京留守判官閻矩爲涪州司戶參軍前開封推官孫嶼爲融州司戶參軍皆秦王廷美官屬坐輔導無狀也趙普以廷美謫居西洛非便復教知開封府李符上言廷美不悔過怨望乞徙遠郡以防他變詔降廷美爲涪陵縣公房州

安置妻楚國夫人張氏削國封命崇儀使閻彥進知房  
州監察御史袁廓通判州事各賜白金三百兩八年正  
月涪陵縣公廷美母陳國夫人耿氏卒雍熙元年廷美  
至房州因憂悸成疾而卒年三十八上聞之嗚咽流涕  
謂宰相曰廷美自少剛愎長益凶惡朕以同氣至親不  
忍寘之於法俾居房陵冀其思過方欲推恩復舊遽茲  
殞逝痛傷柰何因悲泣感動左右遂下詔追封廷美爲  
涪王諡曰悼爲發哀成服其後太宗從容謂宰相曰廷  
美母陳國夫人耿氏朕乳母也後出嫁趙氏生廷俊朕  
以廷美故命廷俊屬韃左右而廷俊泄禁中事於廷美  
適者鑿西池水心殿成橋梁未備朕將泛舟往焉廷美  
與左右謀欲以此時竊發不果卽詐稱疾於邸俟朕臨  
省因而爲變有告其事者若命有司窮究則廷美罪不  
容誅朕不欲暴揚其醜及盧多遜交通事發止令居守  
西洛而廷美不悔過益怨望出不遜語始命遷房陵以  
全宥之至于廷俊亦不加深罪但從貶宥朕於廷美蓋  
無負矣言未訖爲之惻然李昉對曰涪陵悖逆天下共  
聞西池禁中事若非陛下委曲宣示臣等何由知之初  
昭憲太后不豫命太祖傳位太宗因顧謂趙普曰爾同  
記吾言不可違也命普於榻前爲約誓書普於紙尾書

云臣普書藏之金匱命謹密宮人掌之或謂昭憲及太祖本意蓋欲太宗傳之廷美而廷美復傳之德昭故太宗既立即令廷美尹開封德昭實稱皇子德昭不得其死德芳相繼夭絕廷美始不自安已而柴禹錫等告廷美陰謀上召問普普對曰臣願備樞軸以察姦變退復密奏臣忝舊臣爲權倖所沮因言昭憲太后願命及先朝自愬之事上於宮中訪得普前所上章并發金匱得誓書遂大感悟召普謂曰人誰無過朕不待五十已盡知四十九年非矣辛亥以普爲司徒兼侍中他日太宗嘗以傳國之意訪之趙普普曰太祖已誤陛下豈容再誤邪於是廷美遂得罪凡廷美所以遂得罪普之爲也至道初命司門員外郎孫贛爲皇姪諸孫教授廷美諸子之在京者肄業焉真宗卽位追復皇叔涪王廷美西京留守檢校太師兼中書令河南尹秦王張氏楚國夫人咸平二年閏三月詔擇汝鄧地改葬汝州梁縣之新豐鄉仁宗卽位贈太師尚書令徽宗卽位改封魏王子十人德恭德隆德彝德雍德鈞德欽德潤德文德愿德存故事皇族封王者物故則本宮之長封國公其後以次受封於是德鈞子承簡屬最長襲封徐國公官至保康軍留後贈彰化軍節度使安定郡王諡和懿承簡既

薨德雍子承亮襲封昌國公神宗卽位拜感德軍節度使改封榮熙寧二年詔宣祖太祖太宗之子皆擇其後一人爲宗世世封公以奉其祀不以服屬盡故殺其恩禮三年太常禮院言本朝近制諸王之後皆用本宮最長一人封公繼襲去年詔祖宗之子皆擇其後一人爲宗世世封公卽與舊制有異按禮文諸王公侯伯子男皆子孫承嫡者傳襲若無嫡子及有罪疾立嫡孫無嫡孫以次立嫡子同母弟無母弟立庶子無庶子立嫡孫同母弟無同母弟立庶孫曾孫以下準此合依禮令傳嫡承襲詔可乃以承亮爲秦國公奉秦王廷美祀明年

薨贈樂平郡王諡曰恭靜子克愉嗣克愉卒子叔牙嗣元符三年改今封德恭字復禮太平興國四年以皇子出閣拜貴州防禦使廷美徙房陵諸子悉從行因免官廷美卒復以德恭爲峯州刺史弟德隆爲灤州刺史韓崇業爲靜難行軍司馬雍熙元年十二月詔以德恭爲左武衛大將軍封安定郡侯判濟州德隆爲右武衛大將軍封長寧郡侯判沂州諸弟皆隨赴治所令高品衛紹欽送至州常奉外歲給錢三百萬命起居舍人韓檢右補闕劉蒙叟分任二州通判上臨遣之曰德恭等始歷郡善禪贊之苟有關失而不力正止罪爾等端拱元

年進封德恭安定郡公淳化四年改左驍衛大將軍至道二年加左神武大將軍真宗嗣位就轉左武衛大將軍咸平二年召赴闕改封樂平郡公判號州乞奉朝請從之遷勝州團練使景德初改衡州防禦使三年被疾子承慶封股肉食之五月卒年四十五上臨哭之慟廢朝三日贈保信軍節度使追封中國公天禧二年從承慶請加贈護國軍節度兼侍中明道二年追封高密郡王諡慈惠子承慶承壽承慶官至和州團練使卒贈武信軍節度使循國公子六人克繼善楷書尤工篆隸宗正薦之仁宗親臨試及令臨蔡邕古文法寫論語詩書復詔與士朝分隸石經帝曰李陽冰唐室之秀今克繼朕之陽冰也訓子弟力學一門登儒科者十有二人嘗進所集廣韻字源帝稱善藏之秘閣元祐五年以定武軍節度觀察留後卒贈開府儀同三司建國公諡章靖承壽終南作坊使贈德州刺史武當侯子四人克已曉音律嘗作雅樂圖樂曲以獻侍宴大清樓進所學虞世南書賜器加等終右千牛衛大將軍贈深州防禦使饒陽侯子叔韶字君和慶曆六年與諸宗子帝前臨真宗御書選第一皇祐初進所爲文召試學士院中等賜進士及第自太子右監門率府副率遷右領軍衛將軍入

謝命坐賜茶仁宗曰宗子好學者頗多獨爾以文章第  
進士前此蓋未有也朕欲天下知屬籍有賢者宜勿忘  
所學叔韶頓首謝既退又出九經賜之遷右屯衛大將  
軍至和中上書求試煩劇加領賀州刺史終和州防禦  
使贈鎮東節度觀察留後會稽郡公克脩字子莊仁宗  
爲皇子時得出入禁中侍學故仁宗待遇殊厚官御  
大清樓召宗室試書以克脩爲善終右神武軍大將軍  
成州團練使贈同州觀察使馮翊侯子叔克父早世異  
母弟叔瑁甚幼叔克拊視誨教成人先是繼母無叙封  
法叔克請於朝詔從之遂爲定制藏書至萬卷子克入

登科者三卒官唐州防禦使贈崇信軍節度使尹國公  
諡孝齊遺表祈任子有司格不下子撫之抗章自列乞  
如外官法朝廷從其請宗室正任有遺恩自此始德隆  
字日新雍熙三年卒官沂州守年二十三贈寧遠軍節  
度追封臨沂郡公天禧二年從其子承訓之請加贈崇  
信軍節度同平章事承訓官至順州刺史卒贈深州團  
練使德彝字可久太祖召鞠於宮中德隆卒授右千牛  
衛大將軍封長寧郡侯代兄德隆判沂州時年十九飛  
蝗入境吏民請坎瘞火焚之德彝曰上天降災守臣之  
罪也乃責躬引咎齋戒致禱既而蝗自殞儒生乙恕者

郊居肄業一日有尸橫舍下所司捕恕抵獄將寘於法德彛疑其寃命他司按之無異因令緩刑以俟未幾果獲殺人者恕遂得釋進封郡公淳化四年爲右監門衛大將軍遷左武衛大將軍改封廣平部民詣闕乞留有詔嘉獎真宗初召還咸平二年命判滁州與德恭並留不遣三年授徐州刺史累遷保信軍節度觀察留後大中祥符八年卒年四十九上臨奠廢朝三日贈昭信軍節度使追封信都郡王謚安簡明道二年改封潁川子承謨前卒承矩終莊宅使贈博州刺史承勗至供奉官贈六宅副使承範承拱並西京作坊使承衍內殿崇班承錫供奉官德雍字仲達淳化初授右驍衛將軍歷右羽林龍武二將軍累遷蔡州觀察使咸寧郡公終天平軍節度觀察留後贈宣德軍節度同中書門下平章事謚康簡明道中追封廣陵郡王子承睦承亮承睦終左領軍衛大將軍彭州團練虜州觀察使南康侯承亮封秦國公事見上德鈞字子正性和雅善書翰好爲篇什淳化初拜右武衛將軍四遷至右衛將軍景德二年加右監門衛大將軍四年卒贈河州觀察使追封安鄉侯時妻亦卒男女十四人皆幼上甚嗟悼之子承震早卒承緒供奉官承偉承雅承裔承鑑承則並西京作坊使

承裕禮賓副使承翊內殿崇班承簡襲徐國公承幹終  
懷州防禦使贈保靜軍節度使蕭國公子克敦嗜經術  
以宗正薦召試中選賜錢三十萬元豐間集父承幹遺  
文以進神宗嘉之詔承幹父子以藝文儒學名于宗藩  
宜有褒勸於是追封承幹爲東平王而賜克敦敕書獎  
諭以宣州觀察使卒贈開府儀同三司和國公德欽字  
丕從淳化元年授右屯衛將軍四遷右羽林將軍景德  
元年六月卒年三十一贈雲州觀察使追封雲中侯子  
承遵西京作坊使德潤字溫玉頗好學善爲詩淳化元  
年始授右領軍衛將軍四遷右羽林將軍咸平六年二  
月卒年二十九贈應州觀察使追封金城侯德文字平  
砥淳化初授右監門衛將軍累遷滑州觀察使馮翊郡  
公少好學凡經史百家手自抄撮工爲辭章真宗以其  
刻勵如諸生嘗因進見戲呼之曰五秀才宮中由是悉  
稱之德文本廷美第八子其兄三人早卒故德文於太  
爲第五也帝封泰山祀汾陰幸亳德文必奏賦頌帝每  
賜詩輒令屬和數言願得名士爲師友特命翰林學士  
楊億與之游億卒爲詩十章悼之天聖中遷橫海軍節  
度觀察留後拜昭武軍節度使易感德武勝二軍加同  
中書門下平章事仁宗嘗稱爲五相公而不名慶曆四



年宗室王者四人以德文屬祖且賢方漢東平王蒼進封東平郡王加兼侍中德文雖老嗜學不倦晚被足疾不能朝六年薨年七十二初得疾仁宗臨視親調藥飲之及訃聞復臨哭贈太尉中書令申王諡恭裕子六人承顯以王後襲封康國公官至昭化軍節度使薨年七十四贈太尉樂平郡王德愿字公謹淳化元年授右千牛衛大將軍三進秩爲左武衛大將軍咸平二年閏三月卒年二十四贈涼州觀察使追封姑臧侯德存字安世九歲授右千牛衛將軍歷監門至驍衛從祠泰山領樊州刺史祀汾陰以恩遷左羽林將軍大中祥符四年六月卒年三十贈洮州觀察使追封洮陽侯子承衍

賓副使

太祖四子長滕王德秀次燕懿王德昭次舒王德林次秦康惠王德芳德秀德林皆早亡徽宗時追賜名及王封

燕懿王德昭字日新母賀皇后乾德二年出閣故事皇子出閣卽封王太祖以德昭冲年欲其由漸而進授貴州防禦使開寶六年授興元尹山南西道節度使檢校太傅同中書門下平章事終太祖之世竟不封以王爵太宗太平興國元年改京兆尹移鎮永興兼侍中始封

武功郡王詔與齊王廷美自今朝會宜班宰相之上三年二月娶太子太傅王溥女封韓國夫人是冬郊祀加檢校太尉四年從征幽州軍中嘗夜驚不知上所在有謀立德昭者上聞不悅及歸以北征不利久不行太原之賞德昭以爲言上大怒曰待汝自爲之賞未晚也德昭退而自刎上聞驚悔往抱其尸大哭曰癡兒何至此邪贈中書令追封魏王賜諡後改吳王又改越王德昭喜慍不形於色真宗卽位贈太傅乾興初加贈太師子五人惟正惟吉惟固惟忠惟和慶曆四年詔封十王之後以惟忠子從藹龍衣封潁國公而惟吉子守異以眞王後最長與從藹同封守異官至和州防禦使贈武成軍節度使楚國公從藹至齊州防禦使贈武勝軍節度觀察留後韓國公守異從藹卒以惟忠子從信襲封榮國公官至雄州防禦使贈保寧軍節度使楚國公從信卒以惟忠之孫從恪子世規襲封崇國公官至右龍武大將軍沂州防禦使以卒守異子世清累官茂州防禦使以本宮之長得封申國公熙寧中坐上書請襲會祖越懿王封不當奪一官旣而議者是其說乃遷越州觀察使襲封越國公進會稽郡王至保信軍留後愛諸弟作棣萼會於邸中會元豐升祔四后受命告廟方屬疾自

力就事未幾薨贈安化軍節度使開府儀同三司號王  
諡恭安子令廓嗣元符三年改今封先是熙寧中詔封  
楚康惠王之孫從式爲安定郡王奉太祖祀及從式薨  
乃以懿王曾孫世準襲封安定郡王世準從藹子也爲  
人內恕外嚴無綺羅金玉之好凡天子郊廟必從祀由  
金州觀察使拜保靜軍節度使薨年六十八贈開府儀  
同三司追封成王世開襲封世開從誨子惟和孫也七  
八歲日誦萬言旣長學問該洽事後母孝撫孤姪如已  
子宮官吳申爲御史薦其學行命試學士院累召不赴  
神宗褒異之召對便殿論事甚衆時宮僚有缺不卽請  
而以他官攝故私謂公行宗女當嫁皆富家太姓以貨  
取不復事銓擇世開悉言之帝嘉納欲以爲宗正固辭  
乃進一官以其所列著爲令官至奉國軍留後薨贈開  
府儀同三司追封信王諡獻敏世雄嗣世雄亦從藹子  
少力學知名熙寧中詔宗子以材能自表見者官長及  
學官以名上世雄子令鑠在選中嘗請營都宅以處疎  
屬立三舍以訓學者詔用其議置兩京敦宗院六宮各  
建學徽宗卽位以世雄於太祖之宗最爲行尊拜崇信  
軍節度使襲安定郡王知大宗正事崇寧四年薨年七  
十五贈太尉追封淄王諡恭憲世福襲封世福從信子

官至集慶軍節度使薨贈儀王令盪襲爵令盪秦康惠王曾孫也惟正天聖七年以久病帝欲慰安之田保信軍節度觀察留後樂安郡公特拜建寧軍節度使卒贈侍中追封同安郡王諡僖靖無子以弟惟忠子從謙爲嗣官至左龍武大將軍溫州團練使坐射殺親事官削官爵幽之別宅從謙少好學以剛褊廢遂自剄死帝甚悼之贈濟州防禦使濟南侯惟吉字國祥母鄭國夫人陳氏惟吉生甫彌月太祖命輦至內廷擇二女媪養視之或中夜號啼必自起撫抱三歲作弱弓輕矢植金錢爲的俾之戲射十發八中帝甚奇之五歲日讀書誦詩

帝嘗射飛鳶一發而中惟吉從旁雀躍喜甚帝亦喜鑄黃金爲奇獸瑞禽賜之常乘小乘輿及小鞍鞍馬命黃門擁抱出入常從太祖崩惟吉纔六歲晝夜哀號孝章皇后慰諭再三始進饋粥太宗卽位猶在禁中日侍中食太平興國八年始出居東宮授左監門衛將軍封平陽郡侯加左驍衛大將軍進封安定郡公淳化四年遷左羽林軍大將軍至道二年授閬州觀察使凡卽第供億車服賜與皆與諸王埒自餘王子不得僭也眞宗卽位授武信軍節度加同平章事時石保吉先爲使相詔惟吉班其上大中祥符初封泰山以疾不從行詔許爽

愈馳詣行在還頓鄆州惟吉迎謁上勞問再三改感德  
軍節度明年疾復作上屢臨省之親視灼艾日給御膳  
爲營佛事三年五月薨時年四十五廢朝五日贈中書  
令追封南陽郡侯諡康孝惟吉好學善屬文性至孝孝  
章皇后撫養備至親爲櫛沐咸平初以大祖孝章畫像  
服玩器用賜惟吉歲時奠享哀慕甚至每誦詩至蓼莪  
篇涕泗交下宗室推其賢孝雅善草隸飛白真宗次爲  
七卷御製序命藏秘閣其子守節以父所書真草千文  
以獻詔書褒荅仍付史館追贈太尉明道二年封冀王  
子守節守約守巽守度守廉守節累遷彰化軍節

度觀察留後同知太宗正事卒贈鎮江軍節度使追封  
丹陽郡王諡僖穆子世永世延世永襲邢國公官至鎮  
南軍留後熙寧元年薨贈昭信軍節度使南康郡王諡  
脩孝世延終右武衛大將軍絳州防禦使贈武寧軍節  
度觀察留後彭城郡公守約終內園使康州刺史贈沂  
州團練使子世靜世長世靜至左武衛大將軍均州防  
禦使卒贈鎮海軍節度觀察留後北海郡公世長終左  
武衛大將軍解州防禦使贈張信軍節度觀察留後濟  
陽郡公守巽及其子世清事見上守度終左領軍衛大  
將軍英州團練使贈廣州觀察使廬江侯守廉終供備

庫副使贈內藏庫使守康至供奉官惟固字宗幹本名元展太平興國八年改賜名授左千牛衛將軍是冬卒惟忠字令德初名文起太平興國八年賜今名授右千牛衛將軍四遷右龍武軍真宗卽位改右千牛衛大將軍大中祥符二年進左監門衛大將軍叙州刺史五年進昌州團練使八年卒贈鄂州觀察使追封江夏侯明道二年加贈彰化軍節度使追封舒國公子從恪從藹從秉從穎從謹從質從信從謹從恪累官西染院使卒贈磁州刺史東萊侯子世規襲封崇國公從藹終左衛大將軍齊州防禦使贈武勝軍節度觀察留後追封韓國公子世豐終太子右衛率追贈進士及弟世準世雄金安定郡王從信封榮國公官至雄州防禦使贈保寧軍節度使楚國公諡安僖子世福襲安定郡王從秉從穎從謹金禮賓使從質內殿崇班從謹出繼惟正惟和字子禮端拱元年授右武衛將軍歷右驍衛神武龍武軍右衛將軍大中祥符元年領澄州刺史四年遷右千牛衛大將軍六年卒年三十六贈汝州防禦使臨汝侯明道二年加贈永清軍節度觀察留後追封清源郡公惟和雅好學爲詩頗清麗工筆札優游典籍以禮法自居宗室推重嘗和御製詩上稱其有理致及率上謂寧

相王旦等曰惟和好文力學加之謹愿皇族之秀也不幸短命嗟悼久之至於泣下錄其藁二十二軸上親製序藏于秘閣子從審從誨從審終復州防禦使贈寧國軍節度觀察留後宣城郡公嘗坐與人姦除名已而復官從誨終左金吾衛大將軍台州團練使贈襄州觀察使襄陽侯子世開安定郡王事見上紹興元年詔曰太祖皇帝躬業垂統德被萬世神祖詔封子孫一人爲安定郡王世世勿絕今其封不舉朕甚憫之有司其上合封人名遵故事施行時燕秦二王後爭襲封禮部員外郎王居正上言燕王親太祖長子其後當襲封議遂定

自紹興至嘉定襲封者十五人惟令時令應令詔令矜迹頗著餘皆繼嗣媿媿無足稱令時字德麟燕懿王玄孫也蚤以才敏聞元祐六年簽書穎州公事時蘇軾爲守愛其才因薦于朝宣仁太后曰宗室聰明者豈少哉顧德行何如耳竟不許軾被竄令時坐交通軾罰金已而附內侍譚稹以進紹興初官至右朝請大夫呂頤浩請以令時主行在大宗正司帝命易環衛官頤浩言令時讀書能文恐不湏易帝曰令時昔事譚稹頗違清議改右監門衛大將軍榮州防禦使權知行在大宗正事遷洪州觀察使襲封安定郡王尋遷寧遠軍承宣使同

知行在太宗正事四年薨貧無以爲殮帝命戶部賜銀絹贈開府儀同三司令衿紹興五年由邵武軍兵馬都監襲封授華州觀察使尋除同知太宗正事踰年薨令應字深之初懿王生昌州團練使惟固惟固生楚安僖王從信從信生益公世逢世逢生令應授右班禁直遷東頭供奉官累監州縣場庫監司薛昂薦其才易資承事郎調潁州簽判歷綿州通判累知蜀州閬州慶源府召除衛尉少卿擢秘閣脩撰再知慶源府建炎二年分西外宗子於秦州命令應知西外宗正事除御營使司參贊軍事挈宗子避地福州因置司焉元懿太子薨帝

命令屬選藝祖後得三四人尋擢集英殿脩撰知南外宗正再選宗子得伯琮伯浩養宮中後選得伯玖性亦聰惠高宗喜轉令應知泉州尋與祠以歸令衿薨令應改閬州觀察使襲封除同知太宗正事踰年授鎮東軍承宣使再遷保平軍節度使紹興十三年薨年七十五贈少師後追封惠王謚襄靖子子游官至湖北提刑用戶部侍郎王侯薦加直秘閣會建寧節度使士劉知南外宗正司以事去官言者請擇宗室文臣之廉正者代之遂以命子游西南外宗官用文臣自子游始令諱字君序以父任補右班殿直政和中遷承忠郎召試授從



事郎宣和二年以貢士試舍選合格授宣教郎調信州永豐縣丞中興初累遷福州運判兼提點刑獄公事秦檜方柄用安定郡王絕封者十餘年檜死次令衿當封適以事被拘遂命令諛襲封已而令諛以爵遜令衿乃陞令衿秘閣脩撰知台州移知紹興府召權戶部侍郎領嚴饒二州鑄錢局先是諸州錢監兵匠多缺不補積其衣糧號三分缺額錢令諛請以其錢付諸監省朝廷降銅本錢又建議州縣賣官田計所入高下守令進秩減磨勘有差州縣義倉多紅腐請歲出三之一以易新粟水旱爲災檢放不及七分處所卽許賑恤皆從之令

衿薨令諛由崇慶軍承宣使再襲封隆興初除同知大宗正事奏減生日支賜并郊祀賞給以助軍興詔褒之遷敷文閣直學士特授左中大夫知紹興府引疾乞祠以歸尋薨年六十八令諛蒞事明敏有風采然在廣東日嘗與副使章芟不協陰中以法陷芟於死世以此少之令衿嘉孝穆公世峽子也博學有能文聲中大觀二年舍選靖康初爲軍器少監言事忤旨奪官紹興七年以都官員外郎召張浚罷令衿請對留浚言官石公揆論令衿阿大臣復罷久之以事抵臨安中丞李文會劾令衿昔爲大臣緩頰今復奔走請託詔送吏部吏部直

令衿奏除德安府通判遷知泉州泉屬邑有隱士秦系  
故廬唐相姜公輔葬邑旁令衿建堂合祠之郡人感其  
化歸寓三衢嘗會賓客觀秦檜家廟記口誦君子之澤  
五世而斬之句通守汪召錫檜兄壻也頗疑令衿諷教  
官莫汲訴令衿論日月無光謗訕朝政侍御史董德元  
承風旨劾之誣以賊私詔下令衿獄案驗無狀乃論令  
衿謗訕不遜追一官勒停令南外宗正司拘之檜除召  
錫湖南提舉以報之銜令衿必欲置死地初趙鼎之子  
汾歸過衢令衿贖之侍御史徐嘉希檜旨誣令衿與汾  
有密謀伺朝廷機事捕汾下大理寺俾汾自誣與張浚  
李光等謀逆而令衿預焉獄上檜病不能省乃獲免檜  
死復爵二十六年授明州觀察使襲封引疾乞奉燕王  
祠許之尋加慶遠軍承宣使二十八年薨贈開府儀同  
三司令話建炎末爲右武衛大將軍信州防禦使熙寧  
初首封秦王孫從式已而更封燕王曾孫世清宣和中  
又封秦王元孫令盪令盪卒令庇年最長禮官以爲小  
宗不當封紹興元年六月令話得襲封授寧州觀察使  
二年七月薨贈開府儀同三司令德乾道元年爲武德  
郎時安定郡王令諤換文階太宗正司奏令德授定武  
軍承宣使襲封令德貧幾不能出蜀七年令德薨令彬

當封以沈酒聲色不任襲詔武德郎令擡襲封除金州  
觀察使令擡薨時秦王後無當襲者武翼郎子棟屬燕  
王後年又最長得襲封子棟薨九年九月忠訓郎子彤  
襲授容州觀察使紹興二年薨年八十餘慶元元年十  
月忠翊郎子恭襲授利州觀察使子恭薨嘉定二年七  
月子觀襲授金州觀察使四年十一月伯栩襲授宣州  
觀察使嘉定元年十月伯祝襲授福州觀察使八年十  
一月伯澤襲授潭州觀察使

秦康惠王德芳開寶九年出閣授貴州防禦使太平興

國元年授興元尹山南西道節度使同平章事三年冬

加檢校太尉六年三月寢疾薨年二十三車駕臨哭廢  
朝五日贈中書令岐王及謚後加贈太師改楚王子三  
人惟叙惟憲惟能慶曆四年詔封十王之後以惟叙子  
從照封安國公終左金吾衛大將軍歸州團練使贈同  
州觀察使齊國公從照卒以惟能子從古封安國公終  
延州觀察使贈保靜軍節度使同中書門下平章事楚  
國公諡惠恪從古卒惟憲子從式襲封舒國公神宗卽  
位謂勦業垂統實自太祖顧無以稱乃下詔令中書門  
下攷太祖之籍以屬近而行尊者一人裂土地而王之  
使常從獻于郊廟世世勿復絕於是有司推擇以從式

應詔封安定郡王終保康軍節度使贈同中書門下平  
章事追封榮王諡安僖從式旣薨詔以越王曾孫世準  
襲封安定郡王而以從式子世恩襲爵爲楚國公主楚  
王德芳之祀遷楚州防禦使卒贈奉國軍節度使謚良  
僖徽宗卽位改封楚王爲秦王惟叙字懋功性純謹頗  
好學端拱初授左武衛將軍四遷左衛將軍領勤州刺  
史大中祥符四年從祀汾陰拜左千牛衛大將軍八月  
卒年三十五贈懷州防禦使追封河內侯明道二年加  
贈保靜軍節度觀察留後高平郡公子從照封安國公  
從博至右侍禁內殿崇班惟憲字有則美丰儀少頗縱

肆長脩謹善射好吟詠多讀道書端拱初授左屯衛將  
軍累遷左羽林將軍領濱州刺史加左衛大將軍領賀  
州團練使真拜資州團練使大中祥符九年五月卒年  
三十八贈安德軍節度使兼侍中英國公子從式始封  
安定郡王事見上從演禮賓副使從戎從湜並內  
殿崇班從賁供奉官惟能字若拙端拱初授右屯衛將  
軍累遷右神武軍將軍大中祥符元年五月卒年三十  
贈蔡州防禦使張掖侯明道二年加贈集慶軍節度觀  
察留後南康郡公子從古襲安國公從善內殿承制從  
贊崇班

安僖秀王子偁秦康惠王之後高宗族兄也康惠生英國公惟憲惟憲生新興侯從郁從郁生華陰侯世將世將生東頭供奉官令僧生子偁宣和元年舍試合格調嘉興丞是年子伯琮生後被選入官是爲孝宗子偁召赴都堂審察改宗教郎通判湖州尋除直秘閣賜五品服孝宗旣封建國公就傳子偁召對言宗室之寓于外者當聚居官舍選尊長鈐束之年未十五附入州小學十五入大學許依進士就舉未出官者亦許入學聽讀及二年聽參選高宗納其說遷朝奉郎秘閣脩撰知處州已而乞祠許之累官左朝奉大夫紹興十三年

秋致仕明年春卒于秀州時孝宗爲普安郡王疑所服詔侍從臺諫議秦熺等請解官如南班故事普安亦自請持服許之及普安建節子偁以恩贈太子少師旣爲太子加贈太師中書令封秀王諡安僖配張氏封王夫人孝宗受禪稱皇伯園廟之制未備紹熙元年始卽湖州秀園立廟奉神主建祠臨安府以藏神貌如濮王故事仍班諱嗣秀王伯圭字禹錫孝宗同母兄也初以恩補將仕郎調秀州華亭尉累官至浙西提刑司幹辦公事除明州添差通判孝宗受禪上皇詔除集英殿脩撰知台州伯圭在郡頗著政績除敷文閣待制改知明州

克沿海制置使蕃商死境內遺貨巨萬吏請沒入伯圭  
不可戒其徒護喪及貨以歸陞敷文閣直學士以憂去  
服闋再知明州新學宮命宗子入學閑以規矩詔徙戍  
定海兵於許浦伯圭奏定海當控扼之衝不可撤備請  
摘制司軍以實其地從之海寇猖獗伯圭遣人諭降其  
豪葛明又遣明禽其黨倪德二人素號傑黠伯圭悉撫  
而用之賊黨遂散以功進一官累陞顯謨閣龍圖閣學  
士在郡十年政寬和浚湖陂均水利辨冤獄嘗獲鑄銅  
者不忍寘諸法諭令易業民由是無再犯淳熙二年授

安德軍節度使尋加開府儀同三司克萬壽觀使朝德

壽宮上皇賜玉帶加少保封榮陽郡王高宗崩入臨克  
攢宮總護使除少傅光宗卽位陞少師踰年召見遷太  
保封嗣秀王賜甲第於安僖祠側臣僚上言治平中追  
崇濮邸王子孫幾二十人皆自環衛序遷其宮今居南  
班者止師夔一人非所以強本支而固磐石也前未建  
秀邸時欲賦以祿則不免責以吏事今已建邸而猶責  
吏事他日或不免於議治則傷恩不則廢法曷歸之南  
班俾無吏責而享富貴遂詔伯圭諸子得換班紹興二  
年除判太宗正事建請別立宗學以教宗子超拜太師  
免奉朝請尋兼崇信軍節度使賜第還湖州尋薨于家

計聞帝爲輟朝三日追封崇王謚憲靖伯圭性謙謹不以近屬自居每日見行家人禮雖宴私隆洽執臣節愈恭一日孝宗問潛龍時事伯圭辭曰臣老矣不復能記問至再三終不言帝笑曰何大謹也益愛重之嘗欲廣其居金湖爲複閣有司旣度材矣伯圭固辭而止阜陵成遷中書令凡五讓寧宗嘉其志詔別議褒崇之禮贈贊拜不名肩輿至殿門子九人師夔師揆師垂師喬師禹師臯師岩師彌師貢師夔字汝一初以祖恩補官調太平州蕪湖簿隆興元年改右承務郎歷台州秀州通判直秘閣尋知徽州新學舍進直徽猷閣知湖州時歸附從軍而廩於湖者衆不能給師夔請增廩仍別給僦屋錢以安其心帝稱善詔諸郡行之除直龍圖閣遷浙西提刑改江東運判建康務場往往奪民利爲害滋甚師夔首罷之守臣以郡計所資詣師夔請復舊不從池州軍帥霍政與守臣郊上書相攻詔師夔究曲直政密遣人求庇師夔斥之具言狀政坐罷去改秘閣脩撰知明州兼沿海制置使加敷文閣待制轉永慶軍承宣使紹熙元年侍父入覲除興寧軍節度使寧宗卽位加檢校少保克阜陵橋道頓遞使阜陵成遷開府儀同三司侍父歸父薨未踰月師夔亦卒年六十一贈少師追封

新安郡王師揆字元輔初補右承務郎奉祠除添差湖州簽判改婺州通判加直秘閣守臣韓元吉薦其材上以問史浩浩言其聰爽可任召對除江東提舉奏免失陷常平人毋責償改淮南漕尋遷淮西提刑兼提舉領屯田事奏以荒圩給軍士其屯田爲民世業者勿奪從之及代去吏請獻羨錢二十萬師揆曰後將病民矣除直秘閣改江東轉運副使加秘閣脩撰知明州紹興元年授觀察使寧宗卽位除奉國軍承宣使尋陞節度使召見賜肩輿超檢校太保開府儀同三司克萬壽觀使襲封開禧元年奉朝請嘉定七年薨贈太傅追封禮王諡恭惠弟師禹由保康軍節度使除開府儀同三司襲封十六年薨贈太傅追封和王諡端肅



開府儀同三司右軍國錄軍軍事前書右丞相監脩國史領經筵事都總裁脫脫等修

皇明朝列大夫國子監祭酒 臣方從哲

承德郎右春坊右中允管國子監書院事 臣黃汝良等奉

勅重校刊

宗室二

漢王元佐 昭成太子元僖 商王元份

越王元傑 鎮王元僇 楚王元俁

周王元儼 悼獻太子 濮王允讓

太宗九子長楚王元佐次昭成太子元僖次真宗次商

萬曆二十七年刊

宋史卷三百五十五

列傳

一

恭靖王元份次越文惠王元傑次鎮恭懿王元偓次楚恭惠王元偁次周恭肅王元儼次崇王元億

漢恭憲王元佐字惟吉初名德崇母元德皇后少聰警貌類太宗帝鍾愛之年十三從獵近郊兔走乘輿前太宗使元佐射一發而中契丹使在側驚異之從征太原幽薊太平興國中出居內東門別第拜檢校太傅同中書門下平章事封衛王赴上于中書後徙居東宮改賜今名加檢校太尉進封楚王初秦王廷美遷涪陵元佐獨申救之廷美死元佐遂發狂至以小過操挺刃傷侍人雍熙二年疾少間帝喜爲赦天下重陽日內宴元佐疾新愈不與諸王宴歸暮過元佐元佐患曰若等侍上宴我獨不與是棄我也遂發忿被酒夜縱火焚宮詔遣御史捕元佐詣中書劾問廢爲庶人均州安置宰相宋琪率百官三上表請留元佐京師行至黃山召還廢居南宮使者守護諮議趙齊王通翊善戴元頓首請罪帝赦之曰是子朕教之猶不悛汝等安能輔導耶真宗卽位起爲左金吾衛上將軍復封楚王聽養疾不朝再加檢校太師右衛上將軍元佐生日真宗賜以寶帶平居不接人事而事或預知帝嘗遣術士管歸真爲醮禳左右未及白元佐遽曰管歸真至矣帝聞之曰豈非爲物

所憑乎封泰山真拜太傅祀汾陰遷太尉兼中書令又加太師尚書令兼中書令遂拜天策上將軍與元牧賜劔履上殿詔書不名時禁中火元佐表停奉稟助完宮闕不許加兼雍州牧仁宗爲皇太子兼與元牧仁宗卽位兼江陵牧薨年六十二贈河中鳳翔牧追封齊王諡恭憲宗室子弟特給假七日以鹵簿鼓吹導至永安陪塋永熙陵明道二年改封潞王又改魏王子三人允升允言允成神宗封王後以允言子宗說恭憲王長孫嗣封祈國公皇祐中坐帷薄不脩除名又坐坑殺女僕鎖閉宮室外宅其子仲旻官右武衛大將軍道州刺史後因朝邨頭殿下泣訴云父老且病願納身官以贖神宗亦愍之而未俞其請出就馬氣塞不能言及家而卒贈同州觀察使馮翊侯宗說幽死熙寧三年以允升子宗惠襲封魏國公中書言宗惠不應封以恭憲庶長孫允言子宗立嗣宗立從張揆學春秋大清樓侍宴預坐悉賦裸玉詩宗立詩先成仁宗稱善屢賜飛白書旌其文雅至是襲封終武寧軍節度觀察留後贈昭信軍節度使同中書門下平章事南康郡王子仲來嗣終金州刺史子不儻嗣徽宗立改封魏王爲漢王不儻卒子彥清乞襲父爵奉漢王祀詔從之允升字吉先初免乳養明

德太后宮太后親撫視之元佐有疾允升始出第真宗  
賜名元中授右監門衛將軍更賜今名累遷澶州觀察  
使封延安郡公進武寧軍節度觀察留後歷安德建雄  
安國軍節度使景祐二年卒贈太尉平陽郡王諡懿恭  
子十三人宗禮宗旦宗悌宗惠知名宗禮嘗侍宴大清  
樓仁宗賦詩命屬和侍射苑中復獻詩終虔州觀察使  
成國公贈安遠軍節度使同中書門下平章事韓國公  
子仲翹仲髦宗旦字子文七歲如成人選爲仁宗伴讀  
帝卽位獲超選爲群從所詆上書言狀帝曰宗旦陪朕  
幼學勤勞居多此出朕意豈應訴以常格所生母死請  
別擇墓域歲時奠祀後遂著爲法治平中同知大宗正  
事神宗卽位拜崇信軍節度使同中書門下平章事爲  
大宗正賜方團金帶非朝會得乘肩輿元豐三年封華  
陰郡王加開府儀同三司長屬疾十六年宗子有過優  
游誨導一善必以開異時赴朝請者率以私丁給侍宗  
旦建請始得從官給薨贈太尉滕王諡恭孝聽旗節印  
綬從葬宗悌字元發輕財好施故相王氏子持父所服  
帚求質錢宗悌惻然曰宰相子亦至是乎歸帶而與之  
錢所親用詐取藏錕得其狀曰吾不以小故傷骨肉恩  
竟不問所生母早世宗悌不識也聞父婢語平生輒掩

泣繼得其肖貌繪而奉之如生終明州觀察使贈保寧  
軍節度使同中書門下平章事東陽郡王諡曰孝憲宗  
惠封魏國公尋以旁支黜終武昌軍節度觀察留後江  
夏郡王贈鄒王允言累官左屯衛將軍嘗託疾不朝降  
太子左衛率府率歲中復官又坐笞侍婢而兄允升勸  
止悖慢無禮貶副率絕朝謁出之別第以祀汾陰恩復  
率府率還宮久之復朝謁歷左監門衛大將軍黃州刺  
史天聖七年卒贈明州觀察使奉化侯明道二年贈安  
遠軍節度使追封密國公子宗說宗正事並見上宗育  
終右屯衛將軍贈潁州防禦使汝陰侯允成終右神武

將軍濮州防禦使贈安化軍節度使郇國公明道二年  
加贈鎮江軍節度使兼侍中子宗顏宗訥宗鼎宗嚴宗  
曾宗儒宗奭皆爲環衛刺史

昭成太子元僖初名德明太平興國七年出閣授檢校  
太保同平章事封廣平郡王與兄衛王德崇同日受封  
八年進封陳王改名元佑詔自今宰相班宜在親王上  
宰相宋琪李昉請遵舊制不允宋琪等懇請久之上曰  
宰相之任實總百揆與群司禮絕藩邸之設止奉朝請  
而已元佐等尚幼欲其知謙遜之道卿等無固讓也雍  
熙二年元佐被疾以元僖爲開封尹兼侍中改今名進

封許王加中書令上爲娶隰州團練使李謙溥女爲夫  
人因謂宰相曰朕嘗語諸子今姻偶皆將相大臣之家  
六禮具備得不自重乎淳化元年宰相呂蒙正復上言  
乞班諸王下詔不允三年十一月己亥元僖早入朝方  
坐殿廬中覺體中不佳徑歸府車駕遽臨視疾已亟上  
呼之猶能應少頃遂薨上哭之慟廢朝五日贈皇太子  
諡恭孝元僖姿貌雄毅沈靜寡言尹京五年政事無失  
及薨上追念不已悲泣達旦不寐作思亡子詩示近臣  
未幾人有言元僖爲嬖妾張氏所惑張頗專恣捶婢僕  
有至死者而元僖不知張又於都城西佛寺招覓葬其  
父母僭差踰制上怒遣昭宣使王繼恩驗問張縊死左  
右親吏悉決杖停免毀張氏父母塚墓親屬皆配流開  
封府判官右諫議大夫呂端推官職方員外郎陳載並  
坐裨贊有失端黜爲衛尉少卿載爲殿中侍御史許王  
府諮議工部郎中趙令圖侍講庫部員外郎閻象並坐  
輔道無狀削兩任免詔停冊禮以一品鹵簿葬眞宗卽  
位始詔中外稱太子之號焉乾興初改諡無子仁宗時  
詔以允成子宗保出後昭成太子爲孫宗保生二歲母  
抱以入見章獻后后留與處宗保七歲授左侍禁帝親  
爲巾其首父之歸本宮詔朔望出入禁省累官代州防

禦使襲封燕國公性仁恕主藏吏盜米至千斛貫不問嘗書忍字於座右以爲戒熙寧七年卒神宗臨奠其子仲鞠泣曰先臣幼養宮中終身不自言帝感悼遂優贈靜難軍節度使新平郡王諡恭靜仲鞠亦好學能詩事親居喪以孝聞宗保卒子仲恕嗣官至忠州團練使諡純信子士盃嗣

商恭靖王元份初名德嚴太平興國八年出閭改名元俊拜同平章事封冀王雍熙三年改今名加兼侍中威武軍節度使進封越王淳化中兼領建寧軍改鎮寧海鎮東真宗卽位加中書令徙鎮永興鳳翔改雍王永熙復土爲山陵使拜太傅真宗北征爲東京留守薨年三十七贈太師尚書令鄆王改陳王又改潤王治平中封曾王元份寬厚言動中禮標望偉如娶崇儀使李漢斌之女李悍妬慘酷宮中女婢小不如意必加鞭杖或致死上每有恩賜詔令均給李盡取之及元份卧病上親臨問見左右無侍者因輟宮人爲主湯劑初太宗崩戚里皆赴禁中朝晡臨李多稱疾不至元份生日李以衣服器用爲壽皆飾以龍鳳居元份喪無戚容而有謗上之語上盡知其所爲以元份故優容之及是復不欲顯究其罪狀止削國封置之別所元份子三人長允寧次

允懷改允中早卒次則濮王允讓也允讓薨以允寧子宗諤襲號國公至熙寧三年以宗肅嗣封曾國公宗肅亦允寧子也子仲先嗣徽宗卽位改封曾王爲商王詔曰宗室諸王追封大國其世襲子孫尚仍舊國甚未稱正名之意如曾王改封商王其子尚襲曾國之類其令大宗正司改正制以寧遠軍節度使曾國公仲先改封商國公允寧字德之性至孝因父感疾恍惚失常旣而嗜學尤喜讀唐史通知近朝典故工虞世南楷法眞宗賜詩激賞之又善射嘗侍射後苑屢破的賜金帶器幣初授右千牛衛將軍四遷右武衛歷唐州團練潁州防禦同州觀察使進彰信軍節度觀察留後武定軍節度使景祐元年卒贈太尉信安郡王諡僖簡子宗諤宗敏宗孟宗肅宗諤封虢國公官累集慶軍節度使同中書門下平章事進封豫章郡王乞比外使相給奉仁宗以非兼侍中令詰主吏宗諤上章自陳於是御史張商英劾其招權立威等罪坐落平章事英宗卽位還所奪元豐五年薨贈太尉韓王太常諡榮孝上省集議駁之改榮恭僕射王珪復駁之遂諡榮恩宗肅封曾國公兄宗諤嘗亡寶器意宗肅家人子竊之宗肅曰吾廉不足取信兄弟如此乎立償其直宗諤愧不取乃施諸僧久之



器得宗肅不復言元豐五年終安化軍留後以嘗從英宗入慶寧優贈鎮海軍節度使開府儀同三司北海郡王宗敏終右千牛衛大將軍文州刺史贈越州觀察使會稽侯頰涉書傳緣郊恩建請封所生母范氏宗室子得封所生母自宗敏始

越文惠王元傑字明哲初名德和太平興國八年出閣改名授檢校太保同平章事封益王端拱初加兼侍中成都尹劔南東西川節度淳化中徙封吳王領揚潤大鄆督府長史淮南鎮江軍節度使至道二年改揚州大都督淮南忠正軍節度真宗卽位授檢校太尉兼中書

令徐州大都督武寧泰寧等軍節度使改封兗王咸平中再郊祀皆爲終獻加守太保六年七月暴薨年三十二元傑穎悟好學善屬詞工草隸飛白建樓貯書二萬卷及爲亭榭遊息之所嘗作假山旣成置酒召僚屬觀之翊善姚坦獨頰首不視元傑強之坦曰坦見血山安得假山言州縣鞭撻微民以取租稅假山實租稅所爲耳語見姚坦傳中及薨真宗聞之震悼不俟旦步及中禁門乃乘輦臨視哀動左右廢朝五日贈太尉尚書令追封安王謚文惠後改邢王後改陳王無子仁宗以恭憲王之孫允言子宗望爲之後宗望字子國終右武衛

大將軍舒州防禦使贈安化軍節度使觀察留後高密  
郡公仁宗嘗御延和殿試宗子書以宗望爲第一又常  
獻所爲文賜國子監書及以塗金紋羅御書好學樂善  
四字賜之卽所居建御書閣帝爲題其榜子仲郃嗣熙  
寧三年與商恭靖王孫宗肅等同日封陳國公官至陳  
州觀察使卒謚良僖子士關嗣父卒徙行護喪數百里  
路人嗟惻卒贈陳州觀察使徽宗卽位改封陳王爲越  
王。

鎮恭懿王元偓字希道端拱元年出閣授檢校太保左  
衛上將軍封徐國公至道二年拜洪州都督鎮南軍節  
度使真宗卽位加同平章事封彭城郡王俄加檢校太  
傅改鎮靜難彰化進封寧王郊祀東封悉爲亞獻禮成  
授檢校太尉兼侍中護國鎮國等軍節度三年文武官  
詣闕請祠后土元偓以領節帥亦奏章以請詔許之將  
行命爲河華管內橋道頓遞使明年車駕入境元偓奏  
方物酒餼金帛茗藥爲貢儀物甚盛至河中與判府陳  
堯叟分導乘輿度蒲津橋上登鄴丘亭目元偓曰橋道  
頓置嚴謹爾之力也元偓頓首謝及還加中書令領咸  
德安國等軍節度改封相王五年加守太傅真宗自卽  
位以來屢以學術勗宗子元偓首冠藩戚益自修勵上

每製篇什必令屬和一日謂宰相曰朕每戒宗子作詩習射如聞頗精習將臨觀焉因幸元偓邸第宴從官宮僚畢會試七言詩元偓奉觴上壽賜襲衣金帶器幣緡錢又與宗室射于西南亭日晡從官退上獨以中官從幸元偓元儼宮復宴元偓宮如家人禮夜二鼓而罷六年進位太尉八年七月以榮王宮火徙元偓宮於景龍門外車駕臨幸是冬加兼尚書令天禧元年二月換成德鎮寧二鎮進封徐王二年春宮邸遺燼燔舍數區元偓驚悸暴中風眩薨年四十二帝臨哭廢朝五日贈太師尚書令鄧王賜諡恭懿元偓姿表偉異厚重寡言曉

音律後改封密王又改蘇王治平中追封韓王子允弼八歲召入禁中令皇子致拜允弼不敢當御樓親酹得與王子僉坐皇子卽位是爲仁宗允弼累遷武寧軍節度使兼侍中判大宗正事封北海郡王英宗時拜中書令徙王東平神宗卽位拜太保鳳翔雄武軍節度使朝朔望熙寧二年丁母憂悲痛不勝喪固辭起復母葬有日而允弼病篤顧諸子以不得終大事爲恨薨帝臨哭之慟輟朝三日贈太師尚書令兼中書令追封相王諡孝定允弼性端重時然後言諸宮增學官員允弼已貴猶日至講席延伴讀官讀孟子一節領宗正三十年與

濮安懿王共事相友愛爲宗屬推敬子宗績襲祖恭懿  
王封爲韓國公卒贈南康郡王諡良孝宗績弟宗景以  
相州觀察使同知大宗正事神宗以其父允弼司宗父  
故復選用之宗景事母孝居喪如不能勝居第火冒急  
赴家廟不恤其他火亦不爲害元祐中累遷彰德軍節  
度開府儀同三司檢校司空封濟陰郡王宗景喪其夫  
人將以妾繼室先出之於外而託爲良家女且納焉坐  
奪開府旣而還之紹聖四年薨年六十六贈太師循王  
諡曰思宗績旣卒子仲膺嗣自平川節度使徙劔南西  
川徽宗改封韓王爲鎮王

楚恭惠王元偁字令闡七歲授檢校太保右衛上將軍  
涇國公文之領鄂州都督武昌軍節度使真宗卽位加  
同平章事安定郡王進檢校太傅景德二年郊祀遷宣  
德保寧兩鎮進封舒王大中祥符初封泰山加檢校大  
尉兼侍中移平江鎮江軍從祀汾陰加兼中書令改鎮  
南寧國軍節度使五年拜太保自景德後每有大事皆  
爲終獻元偁體素羸多病上幸真源時已被疾懇求扈  
從至鹿邑疾甚肩輿先歸車駕還臨問數四七年薨年  
三十四廢朝五日贈太尉尚書令追封曹王諡恭惠後  
改封華王蔡王有集三卷筆札一卷上爲製序藏之秘

閣子允則官至右千牛衛大將軍卒先是諸王子授官  
卽爲諸衛將軍餘以父官及族屬親疎差等天禧元年  
令宗正卿趙安仁議爲定制安仁請以宣祖太祖太宗  
孫初廢授將軍曾孫授右侍禁玄孫授右班殿直內父  
爵高者聽從高廢其事緣特旨者不以爲例詔中書門  
下樞密院參定行之允則無子以平陽懿恭王之子宗  
達爲後熙寧三年襲封蔡國公鄰家失火盜因爲奸竊  
宗達所服帶旣而得之且知其主名貸不問浚井得銀  
復授之官累武信軍留後薨贈安化軍節度使開府儀  
同三司高密郡王子仲約嗣徽宗卽位改封蔡王爲懿

王

周恭肅王元儼少奇穎太宗特愛之每朝會宴集多侍  
左右帝不欲元儼早出宮期以年二十始就封故宮中  
稱爲二十八太保蓋元儼於兄弟中行第八也眞宗卽  
位授檢校太保左衛上將軍封曹國公明年爲平海軍  
節度使拜同中書門下平章事加檢校太傅封廣陵郡  
王封泰山改昭武安德軍節度使進封榮王祀汾陰加  
兼侍中改鎮安靜武信加檢校太尉祠太清宮加兼中  
書令坐侍婢縱火延燔禁中奪武信節降封端王出居  
故駙馬都尉石保吉第每見帝痛自引過帝憫憐之尋

加鎮海安化軍節度使封彭王進太保仁宗爲皇子加  
太傅歷橫海永清保平定國節度陝州大都督改通王  
涇王仁宗卽位拜太尉尚書令兼中書令徙節鎮安忠  
武封定王賜贊拜不名又賜詔書不名天聖七年封鎮  
王又賜劔履上殿明道初拜太師換河陽三城武成節  
度封孟王改永興鳳翔京兆尹封荆王遷雍州鳳翔牧  
景祐二年大封拜宗室授荆南淮王節度大使行荆州  
揚州牧仍賜入朝不趨元儼廣穎豐頤嚴毅不可犯天  
下崇憚之名聞外夷事母王德妃孝妃每有疾躬侍藥  
晨夕盥潔焚香以禱至憂念不食母喪哀戚過人平生  
寡嗜慾惟喜聚書好爲文詞頗善二王書工飛白仁宗  
冲年卽位章獻皇后臨朝自以屬尊望重恐爲太后所  
忌深自沉晦因闔門卻絕人事故謬語陽狂不復預朝  
謁及太后崩仁宗親政益加尊寵凡有請報可必手書  
謝牘方陝西用兵上所給公用錢歲五十萬以助邊費  
帝不欲拒之聽入其半嘗問翊善王渙曰元昊平未對  
曰未也曰如此安用宰相爲聞者畏其言慶曆三年冬  
大雨雪水冰陳楚之地尤甚占者曰憂在大臣旣而元  
儼病甚上憂形于色親至卧内手調藥屏人與語久之  
所對多忠言賜白金五千兩固辭不受曰臣羸憊且死

將重費家國矣帝爲嗟泣明年正月薨贈天策上將軍  
徐兗二州牧燕王諡恭肅比葬三臨其喪詔以元儼墨  
跡及所爲詩分賜宰臣餘藏秘閣子十三人允熙允良  
允迪允初餘皆早卒熙寧中以允良子宗絳嗣封吳國  
公徽宗改封吳王爲周王允熙終右監門衛將軍滁州  
刺史贈博州防禦使博平侯允良歷五節度領寧海平  
江兩軍封華原郡王改襄陽由同中書門下平章事兼  
侍中至太保中書令好譚寢以日爲夜由是一宮之人  
皆晝睡夕興薨贈定王有司以其父易晦明諡曰榮易  
允迪累官耀州觀察使居父喪不哀又嘗宮中爲優戲

爲妻昭國夫人錢氏所告制降右監門衛大將軍絕朝  
謁錢氏亦度爲洞真道士允初初名允宗勤於朝會雖  
風雨不廢未嘗問財物厚薄惟誦佛書人以爲不慧累  
遷寧國軍節度使同中書門下平章事治平元年卒贈  
中書令博平郡王無子英宗臨奠以允初後事屬其兄  
允良乃以允成孫仲連爲之後

崇王元億早亡追賜名封代國公治平中封安定郡王  
徽宗卽位加封崇王

真宗六子長溫王昶次悼獻太子祐次昌王祗次信王  
祉次欽王祈次仁宗昶祗祈皆蚤亡徽宗賜名追封

悼獻太子祐母曰章穆皇后咸平初封信國公生九年而薨追封周王賜諡悼獻仁宗卽位贈太尉中書令明道二年追冊皇太子

仁宗三子長楊王昉次雍王昕次荆王曦皆早亡徽宗時改封

濮安懿王允讓字益之商王元份子也天資渾厚外莊內寬喜愠不見于色始爲右千牛衛將軍周土祐薨真宗以綠車旄節迎養于禁中仁宗生用簫韶部樂送還卽官衛州刺史仁宗卽位授汝州防禦使累拜寧江軍節度使上建隆觀宅命知大宗正寺宗子有好學勉進

之以善若不率教則勸戒之至不變始正其罪故人莫不畏服焉慶曆四年封汝南郡王拜同平章事改判大宗正司嘉祐四年薨年六十五贈太尉中書令追封濮王諡安懿仁宗在位久無子乃以王第十三子宗實爲皇子仁宗崩皇子卽位是爲英宗治平元年宰相韓琦等奏請下有司議濮安懿王及譙國夫人王氏襄國夫人韓氏仙遊縣君任氏合行典禮詔湏大祥後議之二年乃詔禮官與待制以上議翰林學士王珪等奏曰謹按儀禮喪服爲人後者傳曰何以三年也受重者必以尊服服之爲所後者之祖父母妻妻之父母昆弟昆弟



之子若子謂皆如親子也又爲人後者爲其父母傳曰  
何以期不二斬持重於大宗降其小宗也爲人後者爲  
其昆弟傳曰何以大功爲人後者降其昆弟也先王制  
禮尊無二上若恭愛之心分於彼則不得專於此故也  
是以秦漢以來帝王有自旁支入承大統者或推尊其  
父母以爲帝后皆見非當時取議後世臣等不敢引以  
爲聖朝法況前代入繼者多宮車晏駕之後援立之策  
或出臣下非如仁宗皇帝年齡未衰深惟宗廟之重祇  
承天地之意於宗室衆多之中簡推聖明授以大業陛  
下親爲先帝之子然後繼體承祧光有天下濮安懿王

雖於陛下有天性之親顧復之恩然陛下所以負宸端  
冕富有四海子子孫孫萬世相承皆先帝德也臣等竊  
以爲濮王宜準先朝封贈期親尊屬故事尊以高官大  
國譙國襄國仙遊並封太夫人攷之古今爲宜稱於是  
中書奏王珪等所議未見詳定濮王當稱何親名與不  
名珪等議濮安於仁宗爲兄於皇帝宜稱皇伯而不名  
如楚王涇王故事中書又奏禮與令及五服年月敕出  
繼之子於所繼所生皆稱父母又漢宣帝光武皆稱父  
爲皇考今珪等議稱濮王爲皇伯於典禮未有明據請  
下尚書省集三省御史臺議奏方議而皇太后手詔詰

責執政於是詔曰如聞集議不一權宜罷議令有司博求典故以聞禮官范鎮等又奏漢之稱皇考稱帝稱皇立寢廟序昭穆皆非陛下聖明之所法宜如前議爲便自是御史呂誨等彈奏歐陽脩首建邪議韓琦曾公亮趙槩附會不正之罪固請如王珪等議既而內出皇太后手詔曰吾聞群臣議請皇帝封崇濮安懿王至今未見施行吾載閱前史乃知自有故事濮安懿王譙國夫人王氏襄國夫人韓氏仙遊縣君任氏可令皇帝稱親濮安懿王稱皇王氏韓氏任氏並稱后事方施行而英宗卽日手詔曰稱親之禮謹遵慈訓追崇之典豈易克當且欲以塋爲園卽園立廟俾王子孫主奉祠事翌日誨等以所論列彈奏不見聽用繳納御史勅誥家居待罪誨等所列大抵以爲前詔稱權罷集議後詔又稱且欲以塋爲園卽追崇之意未已英宗命閣門以誥還之誨等力辭臺職誨等旣出而濮議亦寢至神宗元豐二年詔以濮安懿王三夫人可並稱王夫人云王二十八年子長宗懿英宗時爲宿州團練使封和國公神宗以宗懿濮安懿王元子追封舒王子仲鸞常州防禦使父薨諸子皆進官獨不忍受喜翰墨樂施與九族稱賢卒贈武康軍節度使洋國公諡曰良仲鸞弟仲汾幼喜書史

一讀成誦居父喪鄰於毀瘠卒官萊州防禦使贈昭化軍節度使榮國公次宗樸爲隴州防禦使封岐國公宗樸與英宗友愛初詔英宗入居慶寧宮固辭宗樸率近屬敦勸乃入治平中建濮王園廟宗樸遂拜彰德軍節度使封濮國公奉王後神宗卽位加同平章事兼侍中進封濮陽郡王薨贈太師中書令追封定王諡僖穆子仲佺父歿不食者數日母葬時天大雪步泥中扶翼道路歎惻以潤州觀察使卒贈開府儀同三司宗樸旣薨宗誼襲封官至昭化軍節度使同中書門下平章事薨贈太師中書令廣陵郡王諡莊孝宗暉元豐中以淮康

軍節度使襲濮國公安懿王及三夫人改祔命爲誌并題神主加同中書門下平章事開府儀同三司進嗣濮王哲宗立改鎮南節度使檢校司徒紹聖元年薨年六十七贈太師追封懷王諡榮穆子仲璲先是濮國嗣王四孟詣洛享園廟以河南府縣官克亞終獻宗暉之襲封也神宗始命以其子爲之仲璲遂以終獻侍祠凡十餘年父喪哀痛不能勝纔服除而卒官右監門衛大將軍合州刺史宗晟紹聖元年六月以武安軍節度使判大宗正事加檢校司徒嗣濮王明年三月薨年六十五贈太師昌王諡端孝宗晟好古學藏書數萬卷仁宗嘉

之益以國子監書治平將郊而雨或議改祫享英宗訪諸宗晟對曰陛下初郊見上帝盛禮也豈宜改卜至誠感神在陛下精意而已帝嘉納及郊雨霽帝數被疾密請早建儲貳以係天下之望世稱其忠宗晟薨哲宗紹聖二年四月宗愈以鎮安節度使開府儀同三司檢校司徒嗣封故事嗣王以四時詣祠所宗愈方屬疾或曰不可以暑行曰吾身主祀而不往非禮也強輿以行疾遂亟是年八月薨年六十五贈太師追封襄王諡恭憲宗綽嗣官至河陽三城節度使檢校司徒紹聖三年二月薨年六十二贈太師追封榮王諡孝靖宗楚累拜武

勝軍節度使開府儀同三司封南陽郡王紹聖三年三月以檢校司徒改武昌節度使嗣濮王旣嗣爵當詣園薦獻會疾以弟宗漢代行歎曰不能親奉邊豆饗我先王而浮食厚祿安平請以爵授弟不許四年六月薨贈太師惠王諡僖節宗祐克已自約蕭然若寒士好讀書尤喜學易嘉祐中從父允初未立嗣咸推其賢詔以宗祐爲後泣曰臣不幸幼失怙恃將終身悲慕忍爲人後乎敢以死請仁宗憐而從之累遷清海軍節度使開府儀同三司封乘城郡王紹聖四年八月加檢校司徒嗣濮王時以病當祠園廟不肯移疾自秋涉冬連往來元

符元年春又亟往遂薨于祠下贈太師追封欽王諡穆  
恪宗漢英宗幼弟也累拜保寧軍留後鄴國公東陽安  
康郡王元符初以彰德軍節度使開府儀同三司檢校  
司空嗣濮王徽宗卽位徙寧江保平恭寧三鎮判大宗  
正事加檢校司徒太保太尉帝幸濮邸遷其子孫官時  
安懿王諸子獨宗漢在恩禮隆腆大觀三年八月薨贈  
太師追封景王諡孝簡宗漢善畫嘗作八鴈圖人稱其  
工仲增嗣仲增濮王孫於屬爲長故封官至彰德軍節  
度使開府儀同三司政和五年九月薨贈少師追封簡  
王諡穆孝仲御自幼不群通經史多識朝廷典故居父

宗晟喪哲宗起知宗正力辭詔虛位以湏終制累遷鎮  
寧保寧昭信武安節度使封汝南華原郡王政和中以  
檢校少傅恭寧軍節度使開府儀同三司嗣封天寧節  
遼使在廷宰相適謁告伴御攝事率百僚上壽若素習  
者帝每見必加優禮稱爲嗣王宣和四年五月薨年七  
十一贈大傅追封郇王諡康孝仲爰嗣徽宗卽位拜建  
武節度使爲大宗正加開府儀同三司封江夏郡王徙  
節恭寧定武檢校少保少傅宣和五年六月薨年七十  
贈太保追封恭王仲理嗣靖康初爲安國軍節度使加  
檢校少保開府儀同三司嗣濮王者英宗本生父後也

治平三年立濮王園廟元豐七年封王子宗暉爲嗣濮王世世不絕封高宗南遷奉濮王神主于紹興府光孝寺仲湜字巨源楚榮王宗輔之子安懿王孫也初名仲洎熙寧十年授右內率府副率累遷密州觀察使知西外宗正事保大軍承宣使欽宗嗣位授靖海節度使更今名召知大宗正事未行汴京失守康王卽帝位于南京仲湜由漢上率衆徑謁時嗣濮王仲理北遷乃詔仲湜襲封加開府儀同三司歷檢校少保少傅紹興元年克明堂亞獻七年薨帝爲輟朝賜其家銀帛追封儀王益恭孝仲湜事母以孝聞喜親圖史性酷嗜珊瑚每把

玩不去手大者一株至以數百千售之高宗嘗問殿則何如仲湜對曰碎矣帝曰以民膏血易無用之物朕所不忍仲湜慚不能對子士從士街士錢士衍士歆士從靖康末爲洛州防禦使建炎二年同知西外宗正事主管高郵軍宗子士從招潰卒置屯奏假江淮制置使許之賊李在犯楚州士從遣部將乘虛掩襲紐於小勝軍無紀律敗績士從移司衡溫二州臣僚以其弟士錢撓州縣士從不能制遂罷紹興四年遷涇洪二州觀察使權知濮王園令士從乞擇利便地奉安神位從之六年士街授象州防禦使遷華州觀察使同知大宗正事

安慶軍承宣使主奉濮王祠事初以軍興南班宗子權  
罷歲賜至有身歿而不能殮者士銜言于朝詔復舊制  
三十年拜安德軍節度使典宗司凡十四年士錢官至  
安慶軍節度使同知大宗正事隆興元年上言宗司文  
移視官叙高下令諛臣兄也位反居臣下失尊卑叙乞  
易置之詔可其奏士銜官至崇慶軍節度使知西外宗  
正事右諫議何溥論士銜強市海舟罷官已而詔歸南  
班奉朝請隆興中以邊事未寧與士錢奏減奉給恩賞  
之半以助軍興詔加獎諭仲儻景王宗漢子也初授右  
內率府副率轉右監門衛大將軍建炎末授武功大夫

忠州防禦使紹興中遷濟州知南外宗正事八年加檢  
校少保向德軍節度使襲封嗣濮王仲儻生而不慧以  
次得封入見榻前慟哭帝驚問故荅語狂謬帝優容之  
九年薨上輟朝三日追封瓊王謚恭惠士儻安懿王曾  
孫也紹興二十五年十一月襲封除崇慶軍節度使初  
仲儻薨秦檜專政罷襲檜死始封士儻踰年薨贈少師  
追封思王謚溫靖士鞞士儻弟也紹興二十八年由建  
州觀察使襲封授昭化軍節度使初懿王神貌奉安報  
恩寺西挾屋居隘陋士鞞請別營祠堂許之久之加檢  
校少保累加開府儀同三司賜嗣濮王居爲世業除知

大宗正事累加三少克醴泉觀使淳熙七年薨贈太傅  
追封安王士欽仲湜第十一子也由保康軍節度使襲  
封加開府儀同三司累陞三少慶元二年薨贈太傅追  
封韶王不秬安懿王玄孫也年七十六累轉武功郎士  
韶既薨不秬年最高得襲封除福州觀察使由庶官襲  
封自不秬始慶元五年轉武安軍承宣使俄薨贈開府  
儀同三司追封蔣國公不墾由武經大夫授利州觀察  
使襲封開禧初遷寧遠軍承宣使薨贈開府儀同三司  
追封安國公不儔開禧二年由安遠軍承宣使襲封除  
昭慶軍節度使遷檢校少保嘉定十年薨贈少師追封  
高平郡王不嫖由武翼大夫襲封授福州觀察使特嘉  
定十一年也踰年而薨贈開府儀同三司追封惠國公  
臣僚上言嗣濮王元降指揮雖有擇高年行尊之文然  
高宗朝儀王仲湜以德望俱隆越仲琮而選拜武德郎  
躋次當襲封以官卑乃命士儻權奉祠事越十六年始  
正士儻之封是亦不拘定制也乞自今應封者命大宗  
司銓量都堂審察閣門引見然後奏取進止寧宗然之  
不凌父士穠不嫖既薨不凌由右千牛衛將軍授福州  
觀察使襲封嘉定十五年遷奉國軍承宣使十七年薨  
贈開府儀同三司追封惠國公



宋史卷二百四十五終

宋史卷二百四十五  
列傳 三十四

68-11382

